

5006

5006

STURGE ULTRAVIOLET Spectrometer  
 Spectrometer used for  
 measuring the intensity of  
 the ultraviolet light  
 of the sun

Spectrometer 1852

28  
 S-27



# Պ Ա Տ Ո Ւ Ի Ր Ա Ն Ա Ք Ի Ր

ԱՐՔԵՊԻՍԿՈՊՈՍԻՆ ՓԱՐԻԶՈՒ

սառ ոչխար եւ սառ


հաշարուացեալս իշրոյ վիճակին



Ի ՓԱՐԻԶ

Ի ՏՊԱՐԱՆԻ ՇԻՂԷՐԱՅ

—  
1852





28  
S-27

458

Ж

ՏԵԱՌՆ ԱՐԳՈՍՏԵԱՅ ՍԻՊՈՒՐ

ՓԱՐԻԶՈՒ ԱՐԲԵՊԻՍԿՈՊՈՍԻ

# Պ Ա Տ Ո Ւ Ի Ր Ա Ն Ա Գ Ի Ր

*առ ոչխտ եւ առ*

*հաշատուցեալս իշրոյ վիճակին*



Ի ՓԱՐԻԶ

Ի ՏՊԱՐԱՆԻ ՇՐՈՒՄԵՐՍ

1852



С. ПЕТЕРБУРГ  
ИЗДАТЕЛЬСТВО  
САНКТ-ПЕТЕРБУРГСКОГО  
УНИВЕРСИТЕТА  
1984

73293 кн.



1098 - 84

# ՊԱՏՈՒԻՐԱՆԱԳԻՐ

## ԱՐՔԵՊԻՍԿՈՊՈՍԻՆ ՓԱՐԻԶՈՒ



Մ. ԴՈՄԻՆԻԿՈՍ ԱԻԳՈՍՏՈՍ ՍԻՊՈՒՐ ,  
ողորմութեամբն Աստուծոյ և Հնորհիւ առաքելական  
Աթոռոյն Արքեպիսկոպոս Փարիզ քաղաքի ,

Առ Ուխտ և առ Հաւատացեալս մերոյ վիճակիս ող-  
ջոյն և օրհնութիւն ի Քրիստոս :

Ահա դարձեալ վերստին, Եղբարք, ահա դարձեալ ձերս  
Դիտապետ , որ խանդակաթ է ի սէր ձեր՝ որպէս և  
զուր խի ջաջ զիտէք , ոչ ինչ առնելով խտիր ընդ քա-  
ղաքական կարծեաց փոփոխմունս և ոչ ընդ ընկերական  
սրայմանին աստիճանս , և որ առ ի ձէնջ ևս սիրով  
սիրեցեալն է իբրև Հայր հոգւոց ձերոց :

Այլ զուր մանաւանդ զորս ի բազմապատիկ պատճա-  
ռաց առաւելապէսն սիրեցար ըստ օրինակին Քրիս-  
տոսի , բազում անգամ անշուշտ հարցէք անձամբ ցան-  
ձինս եթէ խափանեա՞ց լռեցո՞յց արդեօք մինչև ի սպառ-  
դձայն նորա որոտընդոսան այն շառաչ որ զղրկեաց զԵ-  
րոպէ : Ո՞չ ևս այլ զայցէ արդեօք յարուարձանեայսս  
յայտսիկ՝ հրճուեցուցանել իւրովն այցելութեամբ դա-



րուեստանոցս մեր, և օրհնել զհիւանդս յաղքատին բնակարանս մեր : Մի արդեօք փոփոխումն ինչ զործեցաւ և ի սրտի Առաքելոյն մերոյ և Հովուի : Չի՞ եղև դուժ սիրոյ նորա առ մեզ առ զործաւորքս և առ նասարակ առ աղքատացս բազմութիւն, զորս տէր Քրիստոս՝ մեր և նորին վարդապետ՝ այնքանեաւ սիրով սիրեաց : Իսկ եթէ ի նորա սրտին չեղև ինչ ամենեկին փոփոխութիւն, զի՞ է զի ոչ ևս տեսանեմք մեր զնա, զի՞ է զի ոչ ևս լսեմք զբարբառ նորա. մի թէ երկիւղ ինչ ուստեք արդելուցու զնա, կամ թէ խոհական խորհո՞ւրդ ինչ արդեօք խափան լինիցի նմա :

Արդարև, Եղբարք սիրեցեալք, էր ինչ վայրկեան ժամանակի յորում նամարեալ կարծեցաք թէ անա եկն ենաս կործանումն այն շինուածոյ մարդկայինս ընկերութեան՝ զորմէ ի ձախողակն մեր զգացմունս զուշակ առ ձեզ լինէաք : Այն նարուած, թէպէտ և քաջ կանխածանօթ (քանզի յետ այնչափ մղեղմութեան և խիզախմանց զանազան կուսակցութեանց անհրաժեշտ իմն էր բռնական ինչ վախճան ելից իրացն), այն նարուած՝ ասեմ՝ ընդարմացոյց զամենեւեան առ նասարակ, և խոր լուծիւն պատեաց զմեօք շուրջանակի : Հարկ եղև և մեզ կալ և կապ ունել զբանն Աստուծոյ ի շըրթունս մեր առ ժամանակ մի, զի մի՛ տացուք ինչ պատճառս մեկնաբանութեանց քաղաքայոյզն կրից : Սակայն անդէն միտ եղեալ մերումս նաւատոյ և խելամուտ եղաք, զի Աստուած որոյ խորհուրդքն զեր ի վերոյ գտանին

1098. 74



դուչակութեանց մարդկեղէն խմաստութեան՝ դամենայն  
դպատանարս աշխարհիս ի լրումն խրոց առաջարկու-  
թեանցն վարէ :

Եւ զի՞նչ արդեօք իցէ աստանօր խորհուրդ տեսչութեանն  
Աստուծոյ : Մի՛ որ ընդ այս երկմտեսցի, Եղբարք . կամք  
եղեն Աստուծոյ պարզեւ նախ Պաղղիոյ յետ բուն  
վրդովմանց զանդորրութիւն ցանկալի, վախճան առ-  
նել ներձուածոց որ կեղեքէին զ՛այրենիս, և թումբս  
ընդգէմ դնել աշխարհակործան մոլորութեանցն ողխից  
որ կործանումն անագին սպառնային մարդկայինս ընկե-  
րութեան ողջոյն՝ հիմն ի վեր տապալելով զյաւերժա-  
կանն օրէնս որոց պաշտպան և ջատագով յարեար  
մեք մերովն Պատուիրանազրով ընդգէմ մոլորութեանց  
ապականչաց արզարութեան, և յորս նաստատեալ կան  
և պատիւ մարդկեղէնս բնութեան, և ընտանեաց յապա-  
հովութիւն, և քաղաքաց բարեկարգութիւն, և քաղա-  
քացեաց խաղաղութիւն, և ազգաց բարգաւաճանք, և  
քաղաքակիրթ հրահանգաց յառաջատութիւն՝ որ քրիս-  
տոսական կրօնիցս են ծնունդք :

Իսկ ապա յետ այնորիկ կամ եղև Աստուծոյ ուսուցանել  
մեզ, զի եթէ պետութեանց աշխարհիս յեղափոխութիւնք  
մուտ գտանեն երբէք ի խորհուրդս տեսչութեան խնա-  
մոց խրոց՝ իբրու ծայրայեղ ինչ դարմանք ընդգէմ  
սանճարճակ ազատութեան կամ թէ բռնաւորական իշ-  
խանութեան, սակայն չիք և չիք հնարազգաց քրիստոնէից  
զերծ և անբոյթ կալ յերեսաց քաղաքական վրդովմանց,

և ճշմարիտ յառաջադիմութեամբ թեակոխել ի վայելս  
ամենայն ժամանակաւոր բարեբաստութեանց զորս Աւ-  
ետարանն սուրբ խոստանայ յաւելուածոյ պայմանաւ  
այնոցիկ որ խնդրիցեն նախ զարքայութիւնն Աստու-  
ծոյ և զարդարութիւն նորա <sup>(1)</sup>, եթէ ոչ անբակտելի  
զօղիւ կասկեցեն զերկոսին զայսոսիկ զմեծամեծ և զառ-  
տուածադիր օրէնս, զՂչխանութիւն ասեմ՝ որ մշտնջե-  
նաւոր զօրութեանն է ծագումն՝ ի պաշտպանութիւն  
իրաւանց հասարակաց և առն իւրաքանչիւր աստէն  
յայսմ աշխարհիս, և զԱղատութիւն՝ զնշոյլ ճառագայ-  
թից երեսացն Աստուծոյ ցոլացեալ ի դէմս իւրոյ պատ-  
կերին՝ զի այնու կարողացի մարդ զործել զբարիս :

Արդ այս միաբանութիւն լի օրհնութեամբն Աստու-  
ծոյ և յերջանկութիւն ժողովրդոց մեծապէս կարևոր, յան-  
դորրութեան մարդկեղէնս ընկերութեան կատարի և ի  
բարեկարգ տեսչութեան, ի խաղաղաւէտ հանդարտու-  
թեան կրից, և ոչ ի հրաբորբօք մրցմունս կուսակցու-  
թեանց : Զոր օրինակ ի բնական աշխարհիս՝ նոյն և  
ի բարոյականին պատահէ . ոչ յաշխարհաւեր մրրկաց  
չնչման և ոչ յամպրօպացն զոռալ շառաչմամբ, այլ ի  
լուիկ հանդարտութեան տարերաց բողբոջեն սերմանք ի  
սիրտ երկրի, փթթին զարնայնի, աճեն բարձրանան, և  
ի դէպ ժամանակի ծաղկօք զարդարին և պտղովք ուռ-  
ճանան :

Ժամ պատեհ է և մեզ ի լուութեանս յայսմիկ և յանդոր-  
րութեան հայրենի աշխարհիս՝ համարձակագոյնս տալ

ազատութիւն ջանիցս մերոց ըստ ցանկութեան սրտի որդեկացոյ : Գեր ի վերոյ ճախրելով՝ որպէս միշտն՝ ամենայն քաղաքականութեանց, որպէս և ի նախնունմն Պատուիրանազրի մերում յայտ արարաք զիմաստս մեր յութերորդի աւուր յունիսի անցելոյ ամին, ահա զամբ դարձեալ առ ձեզ, սիրեցեալ Եղբարք, նովին խնամով լցեալք, մխիթարել զձեզ և հրահանգել բանին որ հաւատացաւ մեզ ի Քրիստոսէ : Քահանայապետ եմք մեծի այսր և հոյակապ Եկեղեցւոյ Փարիզացւոց քաղաքիս, և որպէս մի ի յաջորդաց Առաքելոցն սրբոց՝ առ որս ասաց Քրիստոս, « Գնացէք աշակերտեցէք զամենայն հեթանոսս » . թէպէտ և անարժանք նոցին իցեմք՝ ոչ վերջասցուք ի քարոզութենէ աստուածայնոցս բանից :

Եւ հարկ իսկ է յաւուր յայսմիկ քաղցրանալ ձեզ բանիցն որոց մեք սպասաւորս եմք և թարգման, եթէ չգտանիցին բնաւ ի ձեզ արք նմանեալք կշտամբելոցն երբեմն ի Փրկչէն մերմէ, արք որ ախորժիցեն զայթակղել ի լուր յոյժ իսկ չքնաղիցն վարդապետութեանց Աւետարանին սրբոյ . քանզի առաջի կայ մեզ ճառել զմարդասիրութենէ, զեղբայրսիրութենէ, զներողամտութենէ, զքաղցրութենէ, զողորմածութենէ և զանձնանուէր զթասիրութենէ, որք առ հասարակ բանք են հրաշագեղք՝ միովս այսու սրբազան լեզուին բառիւ արտայայտեալք որ է Սէրն :



Յիշխե՛ք արգիօք զի յառաջնունն անդ Պատուիրա-  
նազրի գոր ի նաստատութիւն վճռոց Փարիզեան ժողո-  
վոյն ընծայեցաք՝ զաստապարտս արարաք մեք զմուրու-  
թիւննն տասպալիչս արդարութեան, և վկայ երաշխաւոր  
կարգացեալ մերոցս բանից զամենայն որ ինչ սուրբ և  
սլատկառելի յերկինս և յերկրի կայցէ՛ յայտ յանդիմա-  
նութեամբ ցուցաք զայնտսիկ յիրաւանց այսր առաքինու-  
թեան որ անկ իցեն սեպհականութեան ստացուածոց :  
Յուցաք անդանօր եթէ չէ հնար բառնալ զընչից սեպհա-  
կանութիւն՝ առանց սպաստապուռ ջնջելոյնտլին հարուա-  
ծով և զհետս անդամ արդարութեան : Ասրա ուրեմն նուիր-  
ական իմն է և անմատոյց սեպհականութիւնն՝ և ի ծագ-  
մանիրում և յարգասխա, և յաշխատութեան որով կերպա-  
բանի, և ի գրամազլուխն որովք յաճումն զայ : Զայտ  
տիեզերական ճշմարտութիւն, որ մի յանդրդուելի հի-  
մանց է մարդկայինս ընկերութեան, միաձայն վկայու-  
թեամբ հաստատեն հասարակաց միտք, իմաստասիրաց  
կարծիք, և աստուածաշունչ զիրք, և մեք հոլանեցաք  
զունայնութիւն կարծեաց յուրաստ կացելոցն ի սմանէ,  
կամ թէ զվարդասպետութեանց որ հակառակ սմին  
եղանիցեն :

Ոչ, գոնութիւն Տեանն, ոչ սին սոսկ անուն է արդա-  
բութեանն առաքինութիւն, թէպէտ և բիր մեկնաբանու-  
թիւնս ստայօզս բարդիցեն զայնմանէ մարդկեղէն կրից  
յուզմունք, թէպէտ և մեծեղեն յանցանօք լուծանիցեն  
զայն սմանք, և զիրաւունս անձանց չարաչար վարիցեն ի



վնաս ընկերին : Արդարութիւն ցանց համարեացի բոլորիցն բարոյական առաքինութեանց գերազանց <sup>(2)</sup>, որ ըստ երանելոյն Ամբրոսեայ բանից՝ ամենեցուն զիրն տայ, օտարին իրաց պատկառ կայ, և դանձին օգտակարութեամբ զանց առնէ՝ զի առ ամենեսեան զհաւասարութիւն պահիցէ <sup>(3)</sup> : Սա, որպէս և հրեշտակայինն վարդապետ ասէ, Արմատ է ամենայնի <sup>(4)</sup>, հիմն ընկերական կարգաց, որով և նախկին պայման խաղաղութեան աշխարհի : Տեսաք իսկ զի և առաջինքն իմաստասէրք գնոյն քարոզեն : Արիստոտէլ սքանչելի քան զբնառ առաքինութիւնս կոչէ զսա, քան զերեկոյրին լուսաւորն զեղեցիկ և քան զարուսեակն չքնադազեղ <sup>(5)</sup> : Եւ Կիկերոն ասէ, թէ քան յայլումն ամենայնի՝ յարգարութեան անդ փայլէ առաքինութեանն պայծառութիւն, և ի նմանէ, ի նորին գործադրութենէ արք բարիք զիրեանցն առնուն անուանակոչութիւն՝ քան զամենայն անուն ցանկալի <sup>(6)</sup> :

Սակայն աւասիկ և այլ իմն առաքինութիւն որ չքնադադոյն ևս է՝ ճշգրտագոյն առաջի առնելովն զանեղականն կատարելութիւն, բեղնաւորագոյն ևս՝ զի մօտագոյնս մերձենայ ի մշտնջենաբուղիս ազրիւրն կենաց, և արդարեւ աստուածային առաքինութիւն, զի ինքն իսկ բարութիւնն է Աստուծոյ հեղեալ ի վերուստ ի սիրտ ազգի մարդկան, և ազգեալ ի նոսա ի շնորհացն Քրիստոսի, այն է Սէրն, առանց որոյ ըստ անսուտ պատղամաց առաքելոյն՝ հաւատք և գիտութիւն և արդարութիւն

և գործք բարեաց և ճգնաւորական նահատակութիւնք ոչինչ են յաչս Աստուծոյ : Թէպէտ և համօրէն ամենայն երկնատուր պարզեօք ճոխացեալ իցեմ, թէպէտ և զերաւհրաշ գործովք առաքինութեան պայծառացեալ իցեմ, ասէ մեծն այն աշակերտ Քրիստոսի, եթէ սէր ոչ ունիցիմ՝ ոչինչ եմ յաչս Բարձրելոյն. քանզի ոչինչ է խտիր այնուհետեւ ընդ իս և ընդ պղինձն որ հնչէ կամ ընդ ճնճոյս որ զօղանջն : Յաղազս այսորիկ, Եղբարք սիրեցեալք, և Փարիզեանն ժողով, իբրև ակնարկեաց և զատասպարտ արար զմոլորութիւնսն քանզիչս հիմանց արդարութեան, փութայ ճեպի ի Սիրոյն ջատագովութիւն, զի սա է ամենայն առաքինութեանց մայր և զշխոյ. և առաւելագոյն եւ խնամով հռչակ հարկանէ զիրաւունս սորին այնու զի պնդագոյնս պատուիրէ զսա, քանզի յաւելեալ ի բանս իւր ասէ.

## ՎՃԻՌ

Ընդդէմ մոլորութեանց որ կործանեն զհիսնունս արդարութեան և սիրոյ .

« Բայց և այլ եւ մոլորութիւնք են որ զեղբայրսիրութեանն զօդ թուլացուցանել կամ խզել նկրտին : Եւ  
« ազբիւր մոլորութեանցս խեղաթիւրն այն իմաստաւ  
« սիրութիւն է որ զանագան վարդապետութեամբք

« ուսուցանէ չարաչար՝ եթէ հիմն ամենայն պարտուց  
« բարոյականաց շահն է և օգուտ անցնիւր անձին ։  
« Եւ ո՞վ որ ոչ տեսանիցէ զի վարդապետութիւնք  
« այդպիսիք ոչ միայն տկարացուցանեն զսէր ի սիրտս  
« մարդկան , այլ և զհետս անգամ այսր լաւութեան եղծեալ  
« ջնջեն ի նոցանէ ։ Իսկ մէք որ ցանկամքս պահպանել և  
« նորոգել ի սիրտս ամենեցուն զանվրէպ և զիսկական  
« ծանօթութիւն սիրոյ , դատապարտ առնեմք զայս  
« ամբարիշտ վարդապետութիւն , և մանաւանդ որչափ  
« ինչ մոլորութիւնք անտի յառաջ զայցեն յանհնարին  
« վտանգ եղբայրսիրութեան ։

« Պարծեալ և յորդոր լինիմք առ աւագ երիցունս և  
« առ ամենայն մատակարարս աստուածեղէն բանին՝  
« ստէպ յուչ ածել հաւատացելոց զօրէնս զայս որով  
« պատուիրեաց Աստուած ամենայն մարդոյ խնամ ունել  
« ընկերին . պարզել հաստատել և զբրիստոսականն  
« վարդապետութիւն որ հարկ առնէ մարդկան զիջանել  
« իրերաց՝ հանդերձ վտանգաւ անձանց . հերքել զբանս  
« այնոցիկ որ զբրիստոսական պատուէրս եղբայրսիրու-  
« թեան իբրու անհնարինս ինչ ի բաց մերժեն , և կամ  
« իբրև աւելորդ յաճախութիւնս աստուածպաշտութեան  
« խոտան համարին ։ Եւ համառօտ , զամենայն ջան ի  
« զորձ արասցեն ի թիկոնս հասանել եղբարց մերոց  
« ըստ իրաքանչիւր կարի յամենայն ի պէտս նոցա ։  
« Յայնժամ ապա և աւետարանականն պատուէր  
« փառաւոր եղիցի յաչս ամենայն աշխարհի , յորժամ



« տեսցեն զաղբատն տառապեալ՝ զանարգեալն երբեմն  
« ի նեթանոսաց՝ զի սէր և ձեռնտուութիւն ի մէնջ ընդունի  
« նանդերձ այնու պատուով և մեծարանօք զոր առատա-  
« ձեռնէ նմա յԵկեղեցւոջ ճշմարիտն սէր՝ քրիստոսեան  
« պատուիրանին ծնունդ : »

Յայտ իսկ է ի գեղեցիկ և ի վսեմական բանից աստի  
ժողովոյն զի երկակի մարտնչին մոյրութիւնք ընդդէմ  
քրիստոնէական սիրոյ . քանզի մերթ ամբաստան լինին  
զսիրոյ թէ աւելորդ իմն յաճախութիւն աստուածպաշ-  
տութեան իցէ և ցնորք սրտի՝ անհնարին առ ի զորք ըստ  
նոցա կարծեացն . որով և զուն զործեն այլ իմն փոխա-  
նակ նորին հաստատել պատճառս զործոյ՝ զոր և ստու-  
զագոյն կարծեն , իբրու առաւել իմն մարդկեղէնս բնու-  
թեան յարմարաւոր . մերթ ևս , յափշտակեալ առեալ  
զսիրոյն անուն , և զիմաստս նշանակութեան նորին ոչ  
իմացեալ և կամ ի բաց մերժեալ , այլանդակեն զայն և  
յանարգութիւն հատանեն . զի իմաստասիրական զիւտից  
ամբարտաւան և անձնահաճ մտաց պատշաճեցուցանեն  
զայն : Միովն յուրաստ կան նորա ի սիրոյ՝ հայհոյելով  
զայն առաջի ժողովրդոց , և միւսովն սէր ստապատիր  
ուսուցանեն մարդկան . առաջնովն խստացուցանեն  
զսիրտս նոցա , և երկրորդին յապականութիւն զարձու-  
ցանեն զնոսա :

Ապա ուրեմն հարկ ի վերայ կայ անդրդուելի հաստա-  
տութեամբ ցուցանել թէ զինչ իցէ սէրն քրիստոնէական ,  
որով կարող իցեմք և երկաքանչիւր կողմանցն ի զիմի



հարկանել՝ ըստ Փարիզեան ժողովոյն Հարցն տեսութեան : Եւ իբրև առաջի զնիցեմք և լուսաւորագոյնս ցուցանիցեմք զվսեմական իմաստս սիրոյն , այնուհետև գործ մի զիւրին եղիցի յանդիման առնել թէ յի՛նչ զէմս հակառակ ընդդէմ կբրիցին նմա Բանաւորականին իմաստասիրութեան վարկածք զանազանք , եթէ զառն սոսկականի զբարս և զզնացս առնուցուն ի մէջ , և եթէ տեսչութեան ազգաց և ազանց համարիցին զնոսին պիտանիս : Եւ արդ ասացուք նախ առաջին թէ զի՛նչ իցէ երկնայինս այս միանգամայն և երկրաւոր առաքինութիւն , եթէ զինչ՝ ասեմ՝ Աէրն իցէ . և յետ այնորիկ լուսով այսր աստուածեղէն խորհրդոյ որ յաւետարանէ անտի զայ՝ ի քնին առցուք զվարդապետութիւնս չմիաբանեալս ընդ սիրոյ :

## ԹԷ ԶԻՆՁ ԻՅԷ ՍԷՐՆ ՔՐԻՍՏՈՆԷԱԿԱՆ

### Ա.

Զինչ արդեօք իցէ քրիստոնէականն սէր : Առարի-  
նութիւն քան զմարդկայինս բնութիւն զերագոյն ( թէսկտ  
և հաղորդակից Քրիստոսի եղելոցն զիրագործ ) , որով  
սիրեմք զԱստուած ի վեր քան զամենայն ինչ , և զընկերս  
մեր իրբն զանձինս վասն Աստուծոյ՝ որ ազբիրն է  
ամենայնի որ ինչ արժանի սիրոյ կայցէ ի մարգումս ի  
կենդանատիպ սրատկերի նորին , ուստի և նա ինքն է  
այսր սիրոյ զերագոյն պատճառ (7) :

Եւ ո՞վ որ չտեսանիցէ այժմէն զուղիսս բարոյական  
մեծութեանց , վսեմական գործոց , աստուածահաճոյ  
գնացից , որ յորդահոս բղխամամբ ծաւալին յազբերէ աստի  
յերկինս բացելոյ :

Եզո՞ւկ մեզ , Եզբարբ սիրեցեալք . այնպէս իմն  
ընդելացեալ գտանիմք մեք անգատին ի մանկութենէ ընդ  
հոյակապ ճոխութիւնս քրիստոսական հաւատոց , որպէս  
և ընդ բնութեանն պերճութիւնս , զի հանապաղ նկա-  
տեալ տեսանեմք զնոսին և ոչ գորովին սիրաք մեր  
սիրով և երախտազէտ ըզձիւք : Այլ համարեսցուք առ  
վայր մի եթէ մեծամեծքն այնոքիկ վաղ ժամանակաց  
իմաստասէրք , որ այնքան ախորժանօք խորհրդազգած  
լինել թեակոխէին ամենայնի որ ի սլատիւ մարդկայինս  
բնութեան բերիցի , համարեսցուք եթէ Պղատոն , Արիս-

տոտէլ, Աիկերոն լսէին յանկարծ բարբառ այսպիսի, առնուցո՞ւք արդեօք ի միտ եթէ զիա՛րդ սակուցեալ սքանչացեալ մնային ի տեսիլ յայտնութեան այսպիսոյ չքնաղ և բազմաբեղուն առաքինութեան, այսպիսոյ աստուածակառոյց հիման քրիստոսական կրօնիցս :

Ապա ուրեմն սիրոյն առաքինութիւն ոչ միայն զի առ Աստուած անդր ձգի, այլ և այնու զի առ ընկերն ծաւալի՝ առաքինութիւն է գերբնական, յերկնից ի վերուստ ծագեալ, բայց և ի Քրիստոսէ պատուաստեալ ի յօժարական կիրս որով բերին մարդիկ ի սիրել զմիմեանս երբակի յորգորմամբք համարուն իսկութեան, միօրինակ սերնդեան և նմանատիպ վախճանի :

Ամբթէ սոյն այս սէր է երկրաւոր, որ ի թեւ հաւատոյ ամբարձեալ մինչև ի զիրկս արարչին, և անդ զտեալ պայծառացեալ, և արդարև աստուածարեալ, զայ իջանէ յերկիր՝ լի յորդեռանդն սրբութեամբ, և շուրջանակի ծաւալէ զիւրև զլրութիւն կենդանութեան և զանսպառ բարեաց առաստութիւն, և դարուց ի դարս սիռեալ սերմանէ զյիշատակս իւրոյ բարերարութեանն ի փառս քրիստոնէութեան և ի միսիթարութիւն ազգի մարդկան :

Ամբ թէ դարձեալ, Աստուած ինքնին, որպէս հուպ ընդ հուպ ճոխազոյնս պարգեացուք, կամեցեալ խառնել զմեզ զամենեսեան սիրոյն շաղկասպա յիւր անբաժանելին միութիւն, յանձն իւր առնու սիրողապէս հանդերձ այլովքն անձառական յորջորջմամբք և զՍէրն անուն<sup>(8)</sup>, և զգեցեալ զմարդկայինս բնութիւն՝ զի կարողասցի



սիրելի զմեզ իբրև զիւր նմանակիցո , ի բարձանց երկնից  
իջանէ ի սիրտս մեր , որպէս զի յորդորագոյնս արասցէ  
զմեզ զիրկընդխառն համբուրիւ ողջագուրել ընդ նմա  
զհամօրէն սղզ մարդկան անհուն սիրովն իւրով , որպէս  
և կանխաձայն գուշակութեամբ ծանոյց նա երբևն ի  
ձեռն իւրոյ մարդարէին <sup>(8)</sup> :

Բ

Եւ ուստի՞ յայտ իցէ այս օտարութի կարծեցեալ  
սահման քրիստոնէական Սիրոյ , որ թո՛ւի խոնարհել  
զԱստուած մինչև ի մարդն , և կամ զմարդ մինչև յ Աս-  
տուած ամբառնալ , զմիոյն սէր ընդ միւսոյն իմն խառ-  
նելով : Ինքն իսկ Որդին Աստուծոյ տացէ առ այս  
պատասխանի :

Յողխն խոցոտեալ զառք Փարիսեցոց յերեսաց զթոյն  
գորովոյ զոր տարազայման սիրով՝ ըստ նոցա կար-  
ծեացն՝ ցուցանէր Քրիստոս առ ամենայն մարդիկ առ  
հասարակ , և մահաւանդ առ ամբոխն , առ աղքատն և  
տառապեալ բողմութիւն , ժողովեցան յաւուր միում  
ի ժողով՝ տեսանել թէ լինիցին ինչ զամազիւտ ի սէր  
նորա՝ ի նորին իսկ բանիցն գնա որսալով : Մի ոմն ի  
նոցանէ , օրինացն վարդապետ , մատեաւ առ նա և ստէ .  
« Վարդապետ , ո՞ր պատուիրան է մեծ յօրէնս : »  
Պատասխանի եւ Յիսուս . « Միրեսցես զսէր Աստուած  
« քո յամենայն սրտէ քումմէ և յամենայն անձնէ քումմէ  
« և յամենայն մտոց քոց և յամենայն գորութենէ քումմէ .



« այս է մեծն և առաջին պատուիրան . և երկրորդն  
« նման սմին . Միրեսցես զընկեր քո իբրև զանձն քո »  
յաղագս Աստուծոյ : « Յայս երկուս պատուիրանս  
« ամենայն օրէնք և մարդարէք կախեալ կան <sup>(10)</sup> . » որով  
և երկոքինս մի են :

Տեսանէ՞ք , սիրելիք , եթէ զիա՛րդ յայտ առնիցէ մեզ  
Քրիստոս զաստուածայինն տեսութիւն Միրոյ , և թէ  
ո՛րպէս ի նորին իսկ բերանոյ ընկալաւ Յկեղեցի զմերս  
սահման օտարոտի կարծեցեալ , և այնքանեաւ զեղով  
պանծացեալ :

Ուստի և մեծս այս պատուիրան Միրոյ ուղղեալ  
անօրինէ զմերսն ընդ Աստուծոյ յարաբերութիւնս , և  
միանգամայն զմերսն ընդ ընկերին վարմունս . քանզի  
ամենայն յօժարութիւն կամաց յառաքինութիւնն կոյս ,  
որպէս և սուրբն Թովմաս ասէ , ի սէրն առնու զաղար :

Ապա ուրեմն առ Աստուած՝ որ սկիզբն է և վախճան  
էութեանս մերոյ և աղբիւր ամենայնի որ ինչ սիրելի յարա-  
բաժս կայցէ , առ Աստուած՝ որ կատարելութիւն է ան-  
հուն , և իմաստութիւն անսահման , զերագոյն բարի և երա-  
նութիւն յաւիտենական , առ Աստուած սէրն առաջին :

Բայց և երկրորդն սէր , սէր ընկերին , նման է  
առաջնոյն , որպէս Որդին Աստուծոյ վկայեաց : Ա-  
րնդէ՞ր արդեօք : Վասն զի ըստ պատկերի արարչին  
ստեղծաւ մարդ , ասէ զարձեալ հրեշտակայինն վարդա-  
պետ , և ես յորժամ զընկերն սիրիցեմ՝ զԱստուած ի  
մարդն սիրեմ :



Այսպէս և մանուկ ի հօրէն խրմէ բացական՝ դպաշտօն սիրոյն պատկերինորին հարկանէ, և սէր պատկերին խառնեալ միաւորի ընդ սիրոյ ծնողին . քանզի զհայրն իսկ սիրէ նա ի պատկերի անդ :

Ապա ուրեմն, ըստ արարչազիրն պատուիրանի, Սիրոյննպատակ Սատուած է և ընկերն անանջատաբար. և զոր օրինակ անձամբ զանձինս խաբեմք սիրել զեղբարս՝ եթէ զՍատուած չսիրիցեմք, չիք երկբայութիւն զի յորժամ կասիցիմք ի սիրելոյ զընկերն՝ դադարեմք և ի սիրելոյ զՍատուած :

Զնոյն այլովք բանիւք՝ այլ խորագոյն ևս իմացուածով և իւրովն սեպհական անօսութեամբ յայտ առնէ հրեշտակն այն ի մարմնի, մին ի բազմապայծառ ջահից հրահանգիչն Յկեղեցոյ, զորմէ ի վեր այսր յիշատակ արարաք : Յուցանէ նա ըստ բանականին արուեստի կանոնաց՝ զի անհնար է մարդուս սիրել զընկերն իբրև զանձն՝ եթէ ոչ յՍատուած և վասն Սատուոյ . այլ եկ զբովանդակն իսկ զայն իմաստասիրութիւն սիրոյ զչքնաղագեղն առեալ ածցուք այսր ի մէջ :

« Սատուած, առէ վսեմախոհն վարդապետ, վերջին  
« պատճառ է սիրոյ ընկերին, քանզի որ ինչ սիրելի մեզ  
« կայցէ յընկերին՝ այն իսկ յՍատուած դտանի իբրև ի  
« բնիկն աղբեր, զի նա էակն է գերագոյն և կատարումն  
« էակի : Յորմէ զհետ զայ յայտնապէս զի գործ սիրոյն  
« Սատուոյ նոյն իսկ է ըստ տեսակին որ ինչ և գործ  
« սիրոյ ընկերին <sup>(11)</sup> : »

Եւ ապա, միտ զիր աղաչեմ Եղբարք, զերկաքանչիւր  
զսէրն, զաստուածսիրութիւնն և զեղբայրսիրութիւն որ  
անբաժանելիք են արդեամբք՝ տրո՞նէ նա ի միմեանց  
մտաւորական անջատմամբ, զի ի համեմատութիւն ընդ  
միմեանս ձգիցէ, և աստուածագրեցիկ իմն համարձակու-  
թեամբ նախապատիւ զսէր ընկերին համարի :

« Ըստ երկուս յեղանակս մարթիմք առնուլ զհամեմա-  
տութիւնս զայս, ասէ աստուածաբանիցն սգարագլուխ :

« Նախ՝ յորժամ զմէն մի սէր առանձինն առնուցումք.  
« և յայնժամ չիք երկբայութիւն զի սէրն Աստուծոյ  
« արդիւնականագոյն է. քանզի վարձ փոխարինին վասն  
« նորին ինքեան է, և հուսկ վերջին փոխարէն է վայելել  
« յԱստուած՝ առ որ զիմէ աստուածսիրութեանն  
« բերումն : Սմին իրի իսկ և վարձք խոստացեալ են  
« որոց սիրենն զԱստուած. « Եթէ որ զիս սիրեսցէ,  
« ասէ Քրիստոս, և Հայրն իմ սիրեսցէ զնա, և ես  
« երեսցուցից նմա զիս <sup>(12)</sup> :

« Երկրորդ անգամ, մարթի և յայլ զէմս ի համեմատու-  
« թիւն բերել զերկաքանչիւր զսէրդ. իբր զի յաստուած-  
« սիրութեան անդ Աստուած միայն է որ սիրի, իսկ  
« յեղբայրսիրութեան ընկերն սիրի յազազս Աստուծոյ.  
« այնպէս զի սէր ընկերին յինքն բովանդակեալ ունի  
« զսէրն Աստուծոյ, ուր սէրն Աստուծոյ զսէր ընկերին  
« ոչ բովանդակէ :

« Մարթի ուրեմն, ասէ սուրբն Թովմաս, ի համե-  
« մատութիւն արկանել զկատարեալ սէրն Աստուծոյ որ



« առ ընկերն ևս տարածեալ ձգի՝ ընդ անբաւական և  
« անկատար սիրոյն որ առ Աստուած ևեթ բերիցի :  
« Անբաւական ասեմ և անկատար, զի զայս պատուիրան  
« ունիմք մեք յԱստուծոյ եթէ « Որ սիրէ զ Աստուած՝  
« սիրէ նա և զեղբայր իւր . » և ահա յայս միտս նախա-  
« պատիւ է սէր ընկերին <sup>(13)</sup> : »

Գ.

Սիրոյ առաքեալն Յովհաննէս, սիրեցեալն աշակերտ  
Յիսուսի, անդատին ի սկզբանէ խօսիցն յայտ առնէ մեզ  
զսոյն զայս նախապատուութիւն, և ակն յանդիման  
ցուցանէ զանլուծանելին զօդ կապակցութեան սիրոյն  
Աստուծոյ և սիրոյ ընկերին, և թէ զիարդ խառնին  
միանան սոքա ի կատարումն սիրոյ : Սակայն միանգա-  
մայն և զայս ուսուցանէ զի քան զամենայն ցոյցս սիրոյն  
Աստուծոյ վաւերականագոյն է սէր ընկերին : Չոր է  
սա յորդառատ և ակնավճիտ, որ ի բարձուէ անտի լերին  
ընթացեալ արբուցանէ զմարդագետիւնն առ հասարակ,  
և վկայէ բեղմնարարութեան և յստակութեան աղբերն  
իւրոյ :

« Սիրելիք, ասէ, սիրեսցուք զմիմեանս, զի սէր  
« յԱստուծոյ է, և ամենայն որ սիրէ՝ յԱստուծոյ է  
ծնեալ և ճանաչէ զ Աստուած <sup>(14)</sup>, » քանզի յայտնագոյնս  
իմն յանձին ցուցանէ զբարութիւն նորա և զնախախնա-  
մութիւն և զբաղցրագութն ողորմութիւն :

« Եւ որ ոչն սիրէ՝ ոչ ճանաչէ զԱստուած <sup>(15)</sup> » գէթ արդեամբք զործոց իւրոց . այնուհետև յուրաստ կայ յորդոյ անուանէն և դադարէ ի լինելոյն պատկեր :

Ասես դու սիրել զԱստուած, յաւելու առաքեալն . « այլ զԱստուած ուրուք երբէք չիք տեսեալ . » և դու ինքն տեսեր զնա երբէք յիւրումն էութեան : Արդ զիմօրդ ասիցես թէ սիրես դու արդարև զոր ինչ ոչն տեսանես , և յոր չհասանես երբէք՝ թէպէտ բիւրապատիկ ջանիւ մտացդ ձգտիցիս : Եւ ահա զանտեսանելին զայն տեսանես դու մարմնոյդ իսկ աչօք յիւրումն պատկերի, և կարող ես սիրել զնա յեղբարս քո՝ աներկիւղ ի պատրանաց ցնորից : « Եթէ սիրեսցուք զմիմեանս , ասէ « առաքեալն , Աստուած ի մեզ բնակէ , և (յայնժամ եեթ) « սէրնորա ի մեզ կատարեալ է <sup>(16)</sup> : »

Եւ իբրև ի հաստատութիւն իւրոցն բանից ածէ ի վերայ . « Եթէ որ ասիցէ եթէ սիրեմ զԱստուած , և « զեղբայր իւր ատիցէ , առտ է : » Ընդէ՞ր : Նախ զի որպէս կանխաւ իսկ ասաց և դարձեալ կրկնէ , « Որ ոչ « սիրէ զեղբայր իւր զոր տեսանէ (զոր ըստ պատկերին « Աստուծոյ զիտէ արարեալ , զոր ձեռօքն շօշափէ , զոր « համարուն ճանաչէ անձին , և նմին պայմանի և վիճակի « սահմանեալ , և ինքեան նմանատիպ , և անհամար « պիտոյից որպէս և ինքն՝ ներքոյ անկեալ , և ի կարիս « աղցաւոր կենցաղոյս զնա ինքեան և զանձն նմին « կարօտ) , զԱստուած զոր ոչն ետես (զանմատոյցն

« զգայութեանց , զանտեսանելին ի մարմնաւոր աչաց )  
« զիա՞րզ կարիցէ սիրել <sup>(17)</sup> : »

Եւ երկրորդ անգամ , զիա՞րզ պարծիցի ոք կամ թէ համարիցի սիրել զԱստուած՝ եթէ լուծանիցէ զպատուիրանն նորա զմեծն և զբազմապատիկ քարոզութեամբ հռչակեալ . « Եւ զայս պատուէր ունիմք առ ի նմանէ ,  
« ասէ առաքեալ , զի որ սիրէ զԱստուած՝ սիրէ ևս և  
« զեղբայր իւր <sup>(18)</sup> : Ամենայն որ սիրէ զճնօղն ( զԱստուած )՝ սիրէ և զճնեալն ի նմանէ : Այսուիկ ճանաչեմք  
« եթէ սիրեմք զՈրդին ( կամ զորդիսն ) Աստուծոյ ,  
« յորժամ զԱստուած սիրեսցուք և զպատուիրանս նորա  
« արասցուք . քանզի այս է սէրն Աստուծոյ՝ եթէ զպատուիրանս նորա պահեսցուք <sup>(19)</sup> : »

Ապա ուրեմն եթէ ոք ոչ սիրէ զեղբայր իւր , ոչ սիրէ զԱստուած , ասասցուք և մեք ընդ առաքելոյն սրբոյ և ընդ տեառն իսկ Յիսուսի . ոչ , չսիրես զու զԱստուած՝ եթէ արհամարհիցես զպատուիրանս նորին :

## Գ

Այս է աւասիկ իսկութիւն քրիստոսական վարդապետութեան յաղազս Սիրոյ : Մէր ընկերին խառն է ի նմա ընդ սիրոյն Աստուծոյ որ սկիզբն է նորին և վախճան . և այսպէս յօրինեալ կազմի յերկոցունցն մի միայն առաքինութիւն անբաժանելի , առաքինութիւն զերբնական և աստուածային , որ երևեցաւ երբեմն յաշխարհի յանձին



Տեառն Յիսուսի ընդ Սիրոյն յորջորջմամբ . « Աստուած սէր է : »

Եւ յայնմ ժամանակէ հետէ ի սրտէ անտի նորին , ի սրտէ ասեմ Որդոյն Աստուծոյ և Որդոյն Մարիամու իբրև յերկնաբուղիս , յանսպառ և յանհուն ազբերէ զետա- հետեալ ընթանան շնորհք և սրբութիւն , սէր և զթութիւն , և արգասաբերս զործեն զողիս մարդկան , և ի հիացումն աշխարհի կարգեալ հանդիսացուցանեն անզաղար զգասս գասս նորածնեալ մարդկան զթասիրաց , և սիրոյն վեհազանց , զանազանեալ անուանակոչութեամբք առա- քելոց , մարտիրոսաց , հայրապետաց , երկցանց , կրօնա- տորաց , քարոզչաց , կուսանաց , սրբունեաց և արդարոց յամենայն կարգէ և յամենայն հասակէ , որոց հրեշտա- կատիւն կենցաղ ' նմանեալ վարուցն Քրիստոսի ' հա- նապագորդ պատարագ է ի փրկութիւն հոգւոց և ի զիրութիւն մարմնոց եղբայրակցացն իւրեանց :

Եւ յետ այսր ամենայնի հանրական տեսութեանց զիւրին իմն է խելամուտ լինել եթէ չիք ինչ բնաւ յարա- րածական բնութեանս՝ այսմ զերազանց Սիրոյ զուգա- կան : Զոր և մեծն յիմաստասէրս քրիստոնէից Փապալ՝ հանգերձ իւրովն ինքնուրոյն խորհրդածութեամբ այսպէս յանդիման առնէ .

« Մարմնոցն առ ի հոգւոց անջրպետութիւն օրինակէ  
« զանջրպետութիւնն բիրապատիկ առաւելութեամբ  
« անհուն որ ընդմէջ է հոգւոց և սիրոյ , զի զերբնական է  
« սա »

« Մարմինք ամենայն , հաստատութիւն և աստեղք ,  
« երկիր և որ ի սմա թագաւորութիւնք , ոչ արժեն և ոչ  
« զփոքրիկն ի հողիս . քանզի նա ճանաչէ զայս ամենայն  
« և զանձն ևս իւր , իսկ մարմինքն և ոչ մի ինչ :

« Ամենայն մարմինք համօրէն և ամենայն հողիք  
« միանգամայն հանդերձ ամենայն արդաստեօք իւրեանց  
« ոչ արժեն և ոչ զգուզնաքեայն ի շարժմունս սիրոյ ,  
« քանզի սէր անհնարին բարձրութեամբ գեր ի վերոյ  
« գտանի ամենեցուն նոցա :

« Յամենայն մարմնոց առ հասարակ ոչ է մարթ և ոչ  
« խուն ինչ արտաբերել խորհուրդ . յանհնարիցն է այդ ,  
« և այլոյ կարգի արգասիք : Ըստ նմին օրինակի և  
« յամենայն մարմնոց և ի հողոց առ հասարակ ոչ է  
« մարթ արտաբերել շարժումն ինչ ճշմարիտ սիրոյ .  
« յանհնարիցն է այս և գերբնական ևեթ կարգի գործ<sup>(20)</sup> :

Սէրն ի սրտէ Որդւոյն Աստուծոյ մարդացելոյ միայն  
զայ . վասն որոյ միանգամայն աստուածային է և մարդ-  
կային . այլ զի յաստուածակոյս կողմանէ անտի ունի  
զծագումն , նմին իրի և յանբաւութիւն ձգտի :

## Ե

Յորժամ սէրն Աստուծոյ գերբնական զայսօրինակ  
պատուաստիցի յընդաբոյսն ի մեզ ազդեցութիւն , փոփո-  
խումն մեծ գործի ամենայն մարդկեղէն առաքինու-  
թեանց , որ թէպէտ պանծալիք իցեն երբէք ուրեք :

սակայն ցանց անպտուղք գտանին, և նշոյս այս հող-  
ւոցն արեգական պտղաբերս առնէ զնոսին և զեղեցիկս,  
և վարձուց անբաւից և յաւիտենականաց արժանաւորս :

Աղէ ածէք ի մէջ զո՛ր յառաքինութեանց անտի և  
կամիցիք, և մեք ցուցցուք ձեզ անդէն վաղվաղակի զի և  
այն մի է ի ծաղկանց աստուածատունկ ծառոյս այսորիկ՝  
փթթեալ ի շունչ սիրոյն Քրիստոսի :

Երանելին Օգոստինոս ի հնդեասասներորդի հատածի  
անդ հրաշալի մատենին որ Յաղագս սովորութեանց  
կաթողիկէ եկեղեցւոյ <sup>(21)</sup>, յայտնապէս ցուցանէ զի  
բովանդակութիւն գործնական գիտութեան բարոյա-  
կանին Սէրն է : Եւ մեծն այն վարդապետ՝ քաջ ներկուռ  
իմաստից քրիստոսական կրօնիցս՝ զսէրն Աստուծոյ  
(յորմէ անբաժան համարի միշտ զսէր ընկերին) սկիզբն  
ասէ և աւարտ ամենայն առաքինութեանց : Քանզի են  
իսկ նոքին առ հասարակ իբրու այլ ևայլ բերմունք սիրոյ,  
և շարժմունք սրտի առ Աստուած մասնականք՝ որպէս  
առ գերազոյն բարի, առ կատարելութիւն ծայրագոյն,  
առ իմաստութիւն գերակատար, առ խաղաղութիւն  
ծայրայեղ, առ միութիւն գերազանց :

Որոյ վասն կարող եմք ասել ըստ մեծի այնմ մեկնչի  
Սիրոյն օրինաց, եթէ Խոհեմութիւն՝ որ առ հեթանոսս  
խորամանկութիւն էր հարտար, և փառասիրութեան  
հնարք, և արուեստ ամբառնալոյ զիւրոյ բազդին շինուած  
ի վերայ օտարին աւերակաց, յետ այսր կերպարանա-  
փոխութեան անուանել մարթի Սէր՝ որ ընտրէ զբարին



ի չարէն անյապաղ և անքոյթ յեղանակաւ, և զառ  
Աստուած գնացիցն խնդրեալ դտանէ զաջողագոյն  
ճանապարհ սակս անձին և ընկերաց, զուն զործելով ի  
բաց բառնալ ի շաղաց նոցին զխոչ և զխուլթ՝ որ են  
զթեցմունք և տառապանք կենցաղոյս :

Որոյ վասն հեթանոսացն Արդարութիւն , որ ցանգ  
իսկ անհնարին անիրաւութիւն էր առ ազգս մարդկան ,  
զի յայր սոսկական հղճիմ էր և անկարեկիր , և յայր  
իշխանական անողոք և անսանձելի , սուսերս հանապաղ  
և խարոյկս և տանջանարանս ունելով շուրջանակի , առ  
Սիրոյն օրինօք սէր է Աստուծոյ իբրև աղբեր ամենայն  
կարգաց՝ որ ըստ յառաջադէմ ծաւալել աւետարանին ևս  
քան զևս ձգէ զմարդիկ ի պատկառել յիրաւանց իրերաց  
հաւասարութեան պայմանաւ , և ի փոխանակել զքաղց-  
րութիւն հաւանողութեան ընդ տանջանացն խստու-  
թեան :

Վասն որոյ և Արիութիւնն այն սրտի , որ երբեմն  
անոտի ևեթ պարծանք էր քաջութեան , որով էր զի  
սուսերամարտկացն մոլեգնութեամբ ի մահ անդր զիմէին  
մարդիկ ի դբօսանս ամբոխին , և էր զի ստոյիկեան իմն  
անախտութիւն ի ցաւս կերպարանեալ պարծէին՝ ի չնոր-  
հուկս իմաստասիրացն գոռողութեան , այն արիութիւն  
որով լրումն յաղթանակի համարէին մարդիկ յաչս դնել  
զվտանգս և զամենայն խոչ խափանարար զի կարող  
լինիցին զիշխանսիրութեան կամ զփառաց կամ զհաճոյից  
իւրեանց կատարել զմոլութիւն , զարդիս առ քրիստոս .

Նեայս, և մանաւանդ առ մարտիրոսացն դասս՝ սէր է այն վսեմական որ ամենայնի համբերէ վասն Աստուծոյ և վասն ընկերին, ներէ մտաղիւր իւրոց թշնամեաց, և անդէն իսկ ի տանջանսն զոլով՝ զուարթ ակնարկէ ի դէմս դահացն իւրոց :

Սոյնպէս և Երուսաղէմի, որ արուեստ և եթ էր երբեմն սլանդանելոյ զանձին առողջութիւն առ ի յերկարագոյնս վայելելոյ ի հեշտալիս մարմնոյ՝ հանդերձ տուժիք հոգւոյն արժանեաց, այժմ առ Քրիստոսի աշակերտեալսն, և մանաւանդ առ քահանայսն ողջամիտս և առ Քորս ողորմածութեան, սէր է սուրբ և ողջախոհ մարմնով և մտօք, որ զերծ կայ մնայ յամենայն ապակաւութենէ՝ որպէս զի ազատագոյն և լուսաւորագոյն ևս նահատակեսցի ի ձգել զոգիս առ Աստուած, կամ ի սփոփել զվշտակիրն մարդկութիւն :

## 9.

Միակս այս պատուիրան սիրոյ՝ հանդերձ կրկնակի նպատական իւրով, որ է Աստուած և մարդն, աղբիւր է ամենայն բարոյական պարտուց և հիմն օրինաց առ հասարակ, ասէ սուրբն Թովմաս <sup>(22)</sup> :

Եւ ո՞վ որ անդէտ իցէ Գոմատեայ հոյակապ ճառին, յորում քաջանմուտն այն իրաւագէտ՝ զերածայրեալ իմն իմաստասիրութեամբ, և սարգ և մեկին՝ միանգամայն և անժխտելի ապացուցիւք յայտ առնէ եթէ ո՞րպէս ի

սիրոյն Աստուծոյ որ գերագոյն բարի և վերջին վախճան է մերոյս էութեան՝ բղխեալ ելանէ և սէր ընկերին, այսինքն է ամենայն արարածոյ որ մեզ իցէ բնաւորակից և ի նոյն կարգեալ երանութիւն . և թէ զիա՛րզ այնուհետև ի սիրոյ անտի Աստուծոյ և ընկերին, որ նախկին և կրկնակի օրէնն է մերոյս բնութեան, ամենայն օրէնք բնականք և քաղաքականք յառաջագային, յորս հաստատեալ կայ և մարդկայինս ընկերութիւն, և կրօնից կարգաւորութիւն, և պետութեանց բարեկարգութիւն, և առն իւրաքանչիւր պարտք և իրաւունք, և ընտանեաց պարտականութիւնք, և երգմանց անդրժութիւնք : Եւ անա ըստ քաջին այնմ իրաւագիտի մերում բարոյականն աշխարհ ողջոյն զայսու միակ կենդրոնիւս շուրջ եկեալ ընթանայ, զՍիրովն ասեմ :

Զնոյն և գերահռչակն Պաքոն ըստ նմին օրինակի կանխագոյն իսկ քան զՂոմատ իմացեալ ասէր <sup>(23)</sup> . « Քրիստոսականս կրօն միով և եթ զձազրութեամբ պատրաստէ զմարդիկ առ ամենայն առաքինութիւն, տպաւորեալ յոգիս նոցա զՍէրն՝ որ կարի ի դէպ զօդ կատարման <sup>(24)</sup> կոչեցաւ, զի արդարև իսկ այս առաքինութիւն յինքն ժողովեալ զօդէ զայլսն զամենեսին ... Յորժամ սիրտ ուրուք բորբոքեալ իցէ հրով հշմարխան Սիրոյ, չիք երկբայութիւն զի այնալիսին յայն աստիճան կատարելութեան գտանի յոր չկարէր ժաման վինել հանդերձ ամենայն խրատուք և սատարութեամբ բարոյականին իմաստասիրութեան ... »



« Մարդկեղէն լաւութիւնք առ հասարակ՝ սքանչելիք յաչս մեր, յաւելու Պաքոն, և որ յառաւելագոյն աղնուութիւն զբնութիւնս մեր վերբերեն, խոտորմունս ունին ծայրայեղս. Սէրն միայն ազատ է յայնցանէ : Հրեշտակք խանդացեալք ընդ զօրութիւն արարչին՝ յանցեան և անկան. « Ելից, ասէ սատանայ, և եղէց նմանող Բարձրելոյն <sup>(25)</sup> : » Յանկացաւ և մարդն հաւատարել զիտութեանն Աստուծոյ, և անկաւ. « Լինիջիք իբրև զաստուածս ճանաչել զբարի և զչար <sup>(26)</sup> : » Բայց յորժամ ցանկացան ժաման լինել ի բարութիւն ինչ զուգական բարութեան կամ Սիրոյն Աստուծոյ, ոչ բնաւ վտանգեցան ոչ հրեշտակն և ոչ մարդ, և ոչ վտանգեսցին երբէք : Այլ և հրաւիրանաւ իսկ կոչեցաք մեք նմանող լինել այսմ անասնման սիրոյ. « Սիրեցէք զթշնամիս ձեր. բարի արարէք ատելեաց ձերոց, և աղօթս արարէք ի վերայ այնոցիկ որ լլկենն զձեզ և հալածեն, զի եղիջիք որդիք Հօր ձերոյ որ յերկինս է. զի զարեգակն իւր ծագէ ի վերայ չարաց և բարեաց, և ածէ անձրև ի վերայ արդարոց և մեղաւորաց <sup>(27)</sup> : »

Լուարուք արդ և զոր հրաշալին վկայէ մատենադիր Ոգոյն Բրիստոսական կրօնից. « Իսկ Սէրն՝ Քրիստոսի փրկչին ծնունդ հարազատ՝ ասէ իմաստասէրն այն քերթող, ըստ բնիկ նշանակութեանն զշնորհս և զխնորհքիս յայտ առնէ <sup>(28)</sup> : Արօնն սուրբ, առ ի վերանորոգել զսիրտ ազգի մարդկան և ի նպաստ առաքինութեանց ուղղել զյօժարութիւնս մեր և զգորովանս, նոր իմն

հնարեցաւ կիրաւ, և ի յայտարարութիւն նորին՝ ոչ գտիրելութեանն անուն արկ ի գործ՝ որ թերի ունի զճշգրտութիւնն, ոչ զբարեկամութիւն՝ որ ի զերեզման անգր սուղանի, ոչ զգլխութիւն՝ որ հպաւորն է յոյժ յամբարտաւանութիւն. այլ եղիտ նա զանունդ Սէր, որ զերեսին զառաջինս յինքն բովանդակեա՝ և միանգամայն երկնազդեցիկ իմն ունի գորութիւն : Սովաւ կրօնն սուրբ յերկինս կոյս ուղղէ զմեր ախորժակս, և զտեալ մարբեալ զնոսին առ Սքարիչն վերբերէ. սովաւ ուսուցանէ զայս ճշմարտութիւն սքանչելի, եթէ պարտք են մարդկան սիրել զմիմեանս՝ զի այսպէս ասացից՝ ընդ ձեռն Աստուծոյ, որ հոգևորէ զսէրնոցին, և անցս իմն տուեալ նմին ընդ ինքն՝ զանամահական էութիւնն և եթ պահէ անձին իւրում :

« Սակայն ոչ միայն քրիստոնէական առաքինութիւն է Սէրն՝ ծագեալ ուղղակի ի Յախտենականէն և ի Բանէ նորա, այլ և սերտ իմն զաշնակցութիւն ընդ բնութեան : Եւ այս իսկ անհատ ներդաշնակութիւն երկնից և երկրի, Աստուծոյ և մարդկան, կնիք է յայտարար ճշմարիտն կրօնից : Վաղեմի ժամանակաց կարգադրութիւնք՝ բարոյականքն և քաղաքականք՝ բազում այն է զի հակառակ ընդդէմ ելանեն յօժարութեանց հոգւոյն . բայց քրիստոնէութիւն, նմին հակառակ, ցանդ ի համբոյրս հաշտից է ընդ սիրտս մարդկան, և ոչ պատուիրէ երբէք առաքինութիւնս տարանջատս և ինքնագոյս, այլ առաքինութիւնս որ ի մերոց պիտոյից աստի անուն զձագումն

և ամենեցուն են պիտանիք : Նա զՍէրն հաստատեաց  
իրբևզգուր յորդաջուր յանապատի աստ կենցաղոյս<sup>(29)</sup> : »

## Է

Այսորիկ սահմանք Սիրոյ և այսքան վկայութիւնք  
պատկառելիք շատ իսկ են, որպէս կարծեմքն, ի ցուցանել  
թէ մեծապէս խաբեցան որք միանգամ ի յետին ժամա-  
նակս ի բաց մերժեալ զչքնաղագոյնն յարգասիս քրիս-  
տոսական հաւատոց զՍէրն Ատուծոյ ի վեր քան զամե-  
նայն և զՍէր ընկերիև իջրև զանձիև, զսէրն որ վեհագոյն  
է քան զաշխարհ, և քան զբնութիւն բեղնաւորագոյն,  
և հօրագոյն քան զմահ, փոխանակել կամեցան ընդ այնր  
զայլ իմն յօժարութիւն սոսկապէս մարդկեղէն, ոչ անչորք  
արդարև, այլ անզօր, աւա՛ղ, անձուկ և անկարող որպէս  
և ամենայն ինչ որ ի մարդոյ անտի գայ :

Լոկ և թափուր մնացեալք ի լուսոյ հաւատոց, խորհե-  
ցան անփոյթ առնել զԱստուծոյ և ի բարոյական կարգի,  
զոր օրինակ համարեալն էին թէ կարող իցեն անփոյթ  
առնել զնմանէ ի զիտութեան կարգին : Եւ յետ ի բաց  
մերժելոյ զբանն յայտնեալ յԱստուծոյ, զմեծ լուսատուն  
հոգւոց, արտաքս յանձանց վտարեցին և զչնորս նորին  
և զսէր : Թօթափեալք անկեալք յերկնից անդրէն յան-  
ձինս իւրեանց, կարծեցին անմտաբար եթէ ի մարդկե-  
ղէն բնութեան անդ ուժացելոյ յիւրմէ արարչէն զացեն  
նորք զամենայն առաքինութիւն, զամենայն իմաստու-



թիւն, դամենայն կատարելութիւն, և հուսկ ուրեմն զեր-  
ջանկութիւն բովանդակ: Յայնժամ ապա եղեալ ի մտի  
ղխրոխտապանն խորհուրդ առնելոյ դամենայն յանուն  
մարդոյ լոկոյ, ի ձեռն մարդոյ և վասն մարդոյ, զուն  
գործեցին բառնալ ի միջոյ ոչ միայն զքրիստոնէական  
նկարագիր՝ այլ և զանուն ևս զՍիրոյն: Եւ ի միում ուրեք  
ի դարուց որ ոչ հեռին է ի մերմէս, ի լոյս պայծառ  
քրիստոսական կրօնից, ոմն իմաստասէր առ մի ոմն  
յաղքատաց խօսելով, և իշխեաց հայհոյել զայս հայհոյու-  
թիւն սարսափելի. « Հայցես զու զի ողորմեցայց քեզ  
վասն սիրոյն Աստուծոյ. այլ այդ բառ քստումն ընդ  
ոսկերս իմ զնացուցանէ: Խնդրեա մանաւանդ յանուն  
մարդասիրութեան, և ողորմեցայց քեզ: »

Ո՛վ անմիտ իմաստասէր, չտեսանիցես զի առ սէր  
երկրաւորդ առաքինութեան թիկունս յերկնաւորէն  
դարձուցանելով, զքաղցրն և զպտղաւէտ գոյացութիւն  
թողեալ՝ զուրուատիպ իմն ընտրես կերպարան անշուք և  
ամուլ. չտեսանիցես զի որ զանց զսիրով արարեալ ի մար-  
դասիրութիւն բերիցի, ի քաղաքակիրթ կենաց ի խժոժու-  
թիւն դարձ առնէ, յաւետարանէ ի հեթանոսութիւն,  
յազատութենէ ի գերութիւն: Աղէ պատմեա մեզ զմար-  
դասիրութեանդ քո պատմութիւն. և մի՛ երթեալ առ մար-  
դակերս Ամերիկեայ և Ովկիանիայ խնդրեսցես զպատմու-  
թեանդ վէպս. խնդիր արասցես՝ թէ քաջ՝ առ իմաստա-  
սէրս իսկ Ելլադայ և Հոովմայ, և ապա թէ եկեալ կշռես-  
ցես զքոյդ ընդ սիրոյն հրաշալիս, և հաւանեսցուք քեզ:

Եւ ա՛նա այսպէս, Եզրարք սիրեցեալք, յորժամ  
անջատեալ բաժանիցի որ ի միոջէ միայնոյ աղբերէն  
ճշմարտութեան և սիրոյ, և իւրումն երթայցէ զհետ ամ-  
բարտաւան և խաւարային իմաստութեան, յանտեղիսն  
խարդաւանի և ի զարչելիս : Եւ զայսոցիկ զանյարիր  
վարդապետութեանց արդիւնս մեք իսկ տեսաք մերձ ի  
կատարած անցելոյ դարուն, որ անժառանգէն զազգս և  
զազինս յամենայն երկնաւոր մխիթարութեանց : Ասած  
եղև ոմանց ընկերութիւն ինչ կազմել թափուր յԱստուծոյ  
և ի Սիրոյ, և մարդիկ՝ մարդասիրութեան անուամբն ի  
մա՛ն ետուն զմիմեանս անդթարար : Հարկ եղև կրօնիցն  
Քրիստոսի դարձեալ զալ մտանել հանդերձ Սիրովն  
Աստուծոյ, և անդրէն վերականգնել զբարեկարգութիւն,  
զարդարութիւն, զխաղաղութիւն, զսէր ընկերին, և  
համառօտ՝ այնպիսի ինչ որ առաւելութեամբ ունիցի ինչ  
նմանութիւն ընդ ճշմարտան մարդասիրութեան, կամ թէ  
կատարումն տայցէ՛նմին : Յայնժամ ապա ընկերութիւնն  
սասանեալ և կործանեալ ի մրրկէ անտի՝ կանգնեցաւ  
վերստին և անդրէն ծագկեցաւ երկնայնովքն ազգեցու-  
թեամբք :

Զոր օրինակ յետ ամպրոպալից զիշերոյ ծագկունք  
զաշտարոյսք խառն զերկրաւ տարածեալք և տակաւին  
ևս անձրևով ծանրացեալք՝ ի շնչել առաւօտեան քաղ-  
ցրասիւզ հողմոյն տակաւ ամբառնան, և ի ծագել  
նշուլից արփենուոյն դարձեալ ծաւալեն բուրմունս անու-  
շից ի զիրկս բնութեանն սփոփելոյ, նոյնպէս և մեր

ողիքս ոտնակոխ եղեալք արչաւանաց կրից, նոյնպէս և ժողովուրդք ինքնին ի մրկէ հարուածեալք, յորժամ դարձեալ ընդունիցին զազգումն Սիրոյն Քրիստոսի :

Ո՛հ, անուն առաքինութեանս ևեթ, անուն լի քաղցրութեամբ և շնորհիւ, յորժամ ըստ արժանւոյն ծանիցի՝ զարթուցանէ ի միտս և ազգէ ի սիրտ մարդոյ զամենայն որ ինչ աստուածային կայցէ յերկինս և որ ինչ քաղցրագոյն գտանիցի յերկրի : Ճառագայթ է նա մշտնջենաւոր սիրոյն Աստուծոյ ցոլացեալ յազգ մարդկան յանկեալն և ի տառապեալ . ուղիս է փափկութեան զորովագութ սրտին Քրիստոսի, զեղանչոյլ պայծառութիւն առաքինութեան և կատարումն աւետարանին :

## Ը

Այլ մի՛ թէ յետ աւետարանին քարոզութեան և եթ ճանուցաւ Սէր, և անձանօթ էր ամենեկին առ նախնեօք, և հեթանոսք ինքնին ո՛չ արդեօք վարէին բառիս առ ի յայտ առնելոյ զբարեխնամ զորով զթոյ մարդկան առ միմեանս :

Ոչ, Եղբարք սիրեցեալք, ոչ էր հնար անձանօթ մնալ Սիրոյ և յառաջ քան զբրիստոնէութեան ժամանակսն : Շնորհն ի կատարումն ևեթ բնութեան պարզելի . վասն որոյ հարկ էր տարերաց աստուածարեալ փոխակերպութեանս այսորիկ գտանել և ի խորս անդ բնութեան : Գորովալից զթասիրութիւնք տկարացեալ էին ի մար-



դիկ և նուազեալ, բայց ոչ և շիջեալք. և վկայ երաշխաւոր տողն Տերենտեայ՝ տող վսեմ և ցանդ զրուատեալ,

« Մարդ եմ, և ոչ ինչ մարդկեղէն յինէն օտար համարիմ<sup>(29)</sup> : »

Այսպէս անա և հեթանոսք անգամ փոքր ի շատէ դիտակք էին մարդասիրութեան, եղբայրսիրութեան, բարերարութեան և անձնանուէր նահատակութեան, և անունն բովանդակիչ այսր ամենայնի՝ ի հնչունականէն ի նովմայեցւոցն մտեալ բարբառ, յառաջ ևս քան զՈրդոյն Աստուծոյ բարոզութիւն՝ զեղեցկագոյնն էր ի բառս լեզուին : Մտադիր հրաշանամբ և մեր ըստ հասարակաց կարծեաց՝ ընդ զեղեցիկս այս հատուած բանիցն Արիկերոնի՝ որ բազում անգամ ի վկայութիւն կոչեցեալ է. թէպէտ և նորայն սէր իմաստասիրական՝ որպէս տես ջիբ հուպ ընդ հուպ՝ անձուկ իցէ յոյժ և նկուն առ մեծ վայելչութեամբ և փառօք քրիստոսական Սիրոյն :

« Չիք ինչ ի սահմանս բարոյականին զեղոյ, սակ  
« մեծն այն հովմայեցի պերճախօս, այնպէս պայծառ և  
« մինչև ի հեռաստան ցոլացեալ, որպէս միաբանութիւն  
« մարդոյ ընդ իւրումն նմանոյ. ընկերակցութիւն յորում  
« ամենայն բարիք հասարակաց իմն իցեն՝ Մէր է այն,  
« կամ թէ սէր ազգի մարդկան : Այսր զգացման արմատք  
« ի հայրական զթասիրութեան կան, և անտի ապա ի  
« ձեռն ամուսնութեան և ազգակցութեան զօղից միառու-  
« բեալ զընտանիս՝ արտաքս կոյս ձգի ծառն՝ նախ  
« հեռաւորացն արենակցութեանց ոստովք, և ապա

« խնամութեամբ, դրացեաց մերձաւորութեամբ, նը-  
« մանօրինակ սովորութեամբ և օրինօք, ուխտիւք և  
« դաշամբք ժողովրդոց, և անսահման իմն զօղի որ  
« զբովանդակ ազգ մարդկան միանգամայն շաղկապէ :  
« Յայսմ համաշխարհական միաբանութեան՝ հատուցա-  
« նել իւրաքանչիւր զիւրն, և յամենայն անդամս մարդ-  
« կայինս ազգի գնաւասարութիւն պահել՝ արդարու-  
« թիւն է. առաքինութիւն՝ որում արբանեկեն զթութիւն,  
« բարութիւն, քաղցրութիւն, բարեգործութիւն և ամե-  
« նայն այսպիսի լաւութիւնք <sup>(30)</sup> : »

Անգիտանամք մեք եթէ կանխազգաս՞ ինչ լեալ իցէ  
քերթոյն այնմ ամենայնի զոր Փրկիչն մեր հանդերձեալ  
էր քարոզել, զմեծն զայն եղբայրակցութիւն մարդկան,  
զմիաբանութիւն բնութեան և ազգի, և գնամաշխարհա-  
կանն սիրակցութիւն որ այնմ ինքնին զհետ գայ . կամ թէ  
մարդարէացաս՞ ինչ Աիկերոն, զի այսպէս ասացից,  
զաւետարանականն զգացմունս, ընդ Սիրոյն անուամբ  
( որ այն ինչ զեռ ևս ստուերակերպ նկարագրէր ) ժողո-  
վեալ զամենայն որ ինչ գորովական՝ որ ինչ միաւորական  
գտանէր ի մարդիկ : Սյլ զայս զիտեմք զի միտք վսեմա-  
խոհք և սիրտք վնհագոյնք ճոխացան երբեմն զուշակա-  
կանսն ազգեցութեամբ՝ որպէս զի թարգմանք կացցեն  
պիտոյից իւրեանցն ժամամուկաց : Լսեն նոքա զազա-  
զակն բնութեան զներքին, և հաւատարիմ բարբառով  
կրկնեն զարձագանդան առ ամբոխս ազգաց : Սմին իրի  
և արբ աւագագոյնք՝ յառաջադէմք ընթանան միշտ իւրա-

քանչիւր իւրումն զարու՝ որչառնու ի միտզբանս նոցա : Ապա ուրեմն այս բանք զեղեցիկք չոյակապ պերճախօսին և քերթողին քաջի, որ և ինքեանք ևս ոչ բովանդակ իմանային անշուշտ զոր ինչ ասէինն, ցոյացմունք ինչ են ի միտս նոցա՝ թէ կամիցիք՝ աւետարանին առաւօտու, մինչ չև էր արեղակն ծագեալ ընդ ոլորտս երկնից և համօրէն լուսաւորեալ զնոսին :

Եւ սակայն եթէ ի մօտոյ հայեցեալ նկատիցեմք, այս ևս ցոյացմունք անհետանալ թուին, և հազիւ թէ հեռաւոր ինչ նմանութիւն նշմարի ի սոսա ընդ աւետարանականին սիրոյ : Քանզի պերճախօսն հռովմայեցի մերթ ի բնաւորականն յօժարութիւնս ամփոփեալ սահմանէ զիւրն Սէր, որ ոչ ևս առաքինութիւն է, և մերթ ի զղածմունս հաստատեալս ի փոխազարձն իրաւունս, որ արդարութիւն ևեթ է, որպէս և Աիկերոն ինքնին խոստովան լինի պարզմտութեամբ յաւարտ այնր խօսից, քան զլոկ հաւասարութիւն իրաւանց ոչ ինչ զիտելով զեղեցկագոյն :

Արդ միակ խնդիր այս է ընդ Աիկերոնին սէր մարդկեղէն և ընդ աստուածայինն Սէր Քրիստոսի Յիտուսի . բարի առնել այնոցիկ որ մեզ ինչ առնեն բարիս, կամ թէ և այնոցիկ առնել բարի՝ որ մեզ չարիս առնիցեն : Ո՞ր ի սոցանէ կատարելագոյն իցէ : Ասաց իսկ Քրիստոս յաւետարանի անդ իւրում. Եթէ սիրիցէք զայնոսիկ որ սիրենն զձեզ, զի՞նչ առաքինութիւն իցէ, ո՞ր վաստակ քաջութեան, և եթէ բարի առնիցէք ձերոցն բարեբարաց՝ զի՞նչ աւելի քան զհեթանոսն առնէք : Բայց սիրեցէք



զթշնամիս ձեր, բարիս ընդ չարի հատուցէք, և աղօթս արարէք ի վերայ այնոցիկ որ լլկենն զձեզ և հալածեն . զի եզիջիք որդիք Հօր ձերոյ որ յերկինս է, որ զարեզակն իւր ծագէ և զանձրեն ածէ ի վերայ չարաց և բարեաց <sup>(31)</sup> :

Աամի՞ս զիտել եթէ որպիսի՞ ինչ էր սէրն առ ազգս մարդկան ըստ մտաց Աիկերոնի . ծանիր նախ թէ զինչ հեթանոսքն իմանային ազգ մարդկան ասելով, ևս և իմաստասէրքն և քերթողք : Թէ ելանէր ևս այն երբէք ըստ հայրենեացն սահման, այլ անդր քան զազգան նիզակակիցս բնաւ ոչ անցանէր . և ստրկացն դասք , իմա երկուք յերիւր մասանց բնակչաց աշխարհիս, բացէ ի բաց մերժեալք էին ի նոցանէ : Թէպէտ և զերապանծք էին Աիկերոնի ասացուածքն զհամաշխարհական զօղից բովանդակ ազգի մարդկան, թէպէտ և զեղեցիկ էր Տերենտեայ տողն որ զընկերահաշտ միաբանութիւն քարողէր առ մարդիկ, սակայն այր այլազգի կայր և մնայր Հռովմայեցոյն թշնամի . խուժդուժ էր նա, յետ պարտութեանն թէ ոչ միշտ սատակման՝ զէթ զերութեան արժանի <sup>(32)</sup> :

Թ

Ապա այսուհետեւ ի բաց թողեալ զնետաղօտութիւն ազնուական ջանից և զեղեցիկ զպածմանց և մեծամեծ ազգմանց սակաւաթիւ արանց ընտրելոց, եթէ ի քնին առնուցուժք զհեթանոսացն քաղաքականութիւն յառաջ

քան զքրիստոսական կրօնիցս երևումն, տեսանեմք ի հասարակաց արդիւնս գործոց յամենայն տեղիս և յամենայն ժամանակի զսպիկարութիւն այնր բնաւորական սիրոյ մարդկան, այնր մարդասիրութեան ասեմ որ զուր տարապարտուց սլաճուճեալն էր Սիրոյն անուամբ, զի և աւելի ինչ քան զանունն լոկ ոչ ունէր :

Հանգերձ նովին մարդասիրութեամբ՝ զոր ճոխարար ներքողէ Արկերոն, չէր ինչ արգել իրաւունս ունելոյ հարց սպանանել զորդիս իւրեանց, և զտղայսն նորածինս բացընկեցիկ առնելոյ ըստ իրաւանց, և ոչ զարձեալ խափանէին զերութեանցն արհաւիրք, սլատերազմաց կոտորածք, այսպանումն մարդկան և մարդասպանք բիւրաւորաց ի շուրջ տեսանելեացն տեղիս՝ ի զուարճութիւն ամբոխին :

Զձրի բարերարութեան զանունն ևեթ հազիւ զիտէին նեթանոսացն ժողովուրդք, տառապելոց կարեկցութիւն՝ ի տկարութիւն համարեալ էր առ նոսա, և աղքատաց ձեռնտուութիւն առ հասարակ ո՞ւր երևէր ի նոսա : Ո՞ւր այս խնամք զորովագութք քրիստոնէական բարերարութեան՝ առատաձեռնեալք առ ախտածէտս, առ ալեորս, առ սրբս, առ ընկեցիկն մանկտի, առ սպաշխարող կանանին : Հապա ցուցցեն մեզ ի Սպարտա և կամ ի Հռովմ այնպիսի ինչ որ զնմանութիւն ևեթ բերիցէ զՍիրոյն ապաստանարանաց որ անթիւ են ի բազմութենէ : Յովով զրուատիք ընծայեցան հնոցն հիւրասիրութեան, և սակայն անձանօթ էր առ նոսա զեղեցիկն քան

գամննայն հիւրասիրութիւն, այն զոր Երկինք մատակարարեն երկրիս յապարանս անդ աղքատին ի մակազրեալքն ուրեք պերճ առասութեամբ Օրեան Ստուշոյ <sup>(32)</sup>, ուր արգարե իսկ Ստուած ինքնին սպասեալ մնայ իմն սփոփանս մատուցանել ամենայն աղետից աշխարհի :

Կամփոցի՞ք տեսանել առ հեթանոսս զնշանակս ինչ աղքատսիրութեան . միտ զիք աղաչեմ :

Պղատոն յիւրումն Հասարակապետութեան, մեծն այն վարդապետ մարդկեղէն իմաստութեան Պղատոն, անասուն համարի զաղքատն՝ զոր սարտ է ասէ բառնալ ի միջոյ :

Պղատոս զՀռովմայեցոց ժողովրդեանն կարծիս ի տեսլարանին հոլանեալ ասէր. « Չարիս անհնարինս « գործէ որ հայ տայ մուրողին . զոր ինչ տայն կորուսանէ, « և զվիշտս եղկելոյն առաւել ևս յերկարէ : »

Գաղերիոս Մաքսիմիանոս կամեցեալ ձեռնառու լինել հասարակաց զոյգն ծախիւք արծաթոյ, հրաման տայր ժողովել զամենայն զմուրոզս Հռովմայ, ի նաւս հնոտիս իջուցանել զնոսա և ընկղմել ի խորս ծովու :

Քառ ի մէնջ ասել եթէ այս ամենայն արհաւիրք որ առ Յոյնս և առ Հռովմայեցիս գործէին՝ քաղաքականութեան նոցին իցեն արգասիք, սակայն ստիպիմք յայտ առնել զի մարդիկ որ ի յոլով ինչ իրս օրինակք մեզ մնացին զարմանալիք, թերևս և շնորհականք՝ մանաւանդ ի ձեռագործս արուեստից, և որ առաքինութիւնս ևս մարդկեղէնս զերածայրեալս գործեցին, հանդերձ



այնքան զխտութեամբն և զօրութեամբ և փառօք՝ ի մարդասիրութեան և ի բարեբարութեան սակին խոնարհեցան անկան մինչև ի գետին : Եւ ընդէ՛ր արգեօք . այլ զի ամենայն զթասէր յօժարութիւնք որ ի մարդուսն՝ հեռացեալ մեկնեալ էին յաստուածեղէն նպատակէ անտի որով միայն սրբին նոքա և ստղաբերս և հանրականս զործին , և միանգամայն լոկ և թափուր էին ի զերբնական զրգմանէն որ տեսականս առնէ զնոսին և աննկունս , և մշտնջենաւորակիցս Աստուծոյ : Կորոյս մարզն , աւա՛ղ , զսէրն Աստուծոյ . նմին իրի կորոյս և զսէր ընկերին , և ի պատճառս մեղացն անձամբ զանձն կործանեալ արկ ընդ ձեռամբ ինքնահաճ ամբարտաւանութեան : Աւերակ մեծ հրաշակերտին յարարածս Աստուծոյ , յորում ենն այն ճիւաղ մարդկեղէն՝ անձնասպաշտ , անձնասէր և շահախնդիր , անձին միայնոյ զիւրութեանն խնամով մոլեղնեալ՝ ճարակի զոյիւ և արտասուօք , քրտամբք և արեամբ այլոց ի մարդկանէ :

Քանզի զարձեալ՝ անհնար է մարդուսն յաղթող լինել ինքնահաճ կրից և երբակի ցանկութեանցն յորս արմատացեալ կայ և կազգուրեալ զօրանայ ցանկ կատանդին այն թշնամի մարդկային ընկերութեան , եթէ ոչ վերնահանաւ իմն զօրութեամբ և զերբնական սատարութեամբ : Աւրդ այս զօրութիւն՝ քան զբնութիւն մարդոյ զերագանց , որ յաղթող առնիցէ զնա ցանկութեան և անձնասիրութեան , սէրն Աստուծոյ է միայն , սէր անժամանակ և անտանձն՝ հեղեալ սքանչելապէս ի սիրտ մարդկութեան :

Ուր ուրեմն եղև օր, և Սէրն կենդանարար եկն և բնակեցաւ յաշխարհիս՝ ծնանել զսա վերստին, և սարգեւել սմին զչնորնս իւր և զազգմունս. և ահաւասիկ կարճառօս բանիւ այս պատմութիւնն հրաչալի՝ ըստ անսուտն վկայութեանց երկնի և երկրի :

Ժ

Աստուած որ Սէրն է յաւիտենական և իսկական, ասէ Առաքեալն սիրոյ <sup>(33)</sup>, այնպէս սիրեաց զաշխարհս՝ զի զմիտն Որդին իւր ետ, զի ամենայն որ հաւատայ ի նա՝ մի՛ կորիցէ, այլ ընկալցի զկեանսն յաւիտենականս <sup>(34)</sup> : Եւ յայսմ առաւելապէս յայտնի եղև սէրն Աստուծոյ առ մեզ, զի նա նախ սիրեաց զմեզ, մինչդեռ մեք ոչն սիրէաք զնա և էաք յանիրաւութեան, և ի մեղս, և ի մահու <sup>(35)</sup> : Յայնժամ ահա առաքեացնս առ մեզ զՈրդին իւր պատարագ քաւութեան մեղաց մերոց, որպէս զի նորին արեամբն վերածնեալք, և պատարագան ի հաշտութիւն եկեալք, այնուհետև աստուածային իմն կեցցուք կեանս, և յետ կերպարանակից լինելոյ վարուցնորին և առաքինութեանց՝ լիցուք յաւուր միում և փառացն հազորդակիցք <sup>(36)</sup> :

Բանն Աստուած առաքեալ ի Հօրէ՝ էջ յերկիր միանալ ընդ մերումս բնութեան, որ ասականեալն էր մեղօք և վարակեալ ցանկութեամբ, և խստացեալ անձնասիրութեամբ, զի կանգնեսցէ զսա և ջեռուսցէ, ընդարձակեսցէ և կենսազործեսցէ, ուսուցանելով սմա թէ

զիարդ լինիցի ճշմարտապէսն սիրել, այսինքն է այնպէս որպէս Աստուած սիրէ, որոյ վասն և մարմին եղև <sup>(37)</sup> :

Բանն Աստուած յախտենական՝ մարմին եղև ի ժամանակի-իրրև զմեզ . ճնաւ ի մերմէ սեռէս, զմերս արին յերակունս իւր խառնեաց, և ազգս մարդկան յազգաբանութիւնս իւր ի կարգ արկեալ թուեաց և զԱստուած <sup>(38)</sup> : Աստուած որդի եղև մարդոյ, զի և մարդն լիցի որդի Աստուծոյ, և մարդկութիւնս ողջոյն բարձրացի, փառաւորեսցի և աստուածացի <sup>(39)</sup> :

Եւ արդ, Եղբարք սիրեցեալք, քանզի աստուածեղէն բնութիւնն խառնեցաւ այսպէս ընդ մարդկեղէնս բնութեան <sup>(40)</sup> զի կերպարանափոխ արասցէ զսա, և զսերունդս Ազամայ սերունդ արասցէ Աստուծոյ, ո՞վ ոք ոչ տեսանիցէ զի սէր մարդկան խառնեալ միացեալ ընդ սիրոյն Աստուծոյ, ըստ նմին նամեմատութեան աճէ դաճումն անսահման :

Սա է աւասիկ քրիստոնէականն Սէր : Այսպէս ա՛հա, որպէս արդ իսկ ասացար, պատուաստեցաւ երկնայինս այս առաքինութիւն յամուլն մարդկութիւն՝ ի բեղմնաւորել զ՛ոզիս, յընդարձակել զսիրաս, և քան զտիեզերս ամենայն մեծատարածս յարդարել զնոսին և երկնանմանս ընդարձակութեամբ :

## ՓԱ.

Յաւուր յորում իսկական Որդին Աստուծոյ եղև



խսկապէս որդի մարդոյ, զի և մարդն ինքնին որդի Սատուծոյ լինիցի ճշմարիտ որդեգրութեամբ <sup>(41)</sup>, եղբարք եղաք մեր Քրիստոսի, ոչ միայն այնու զի և նա մարդ է՝ ազամածին զոլով իբրև զմեզ, այլ և այնու զի Սատուած է, որդեգրութեամբս մերով Հօր իւրում: « Տեսէք, զոչէ « աստանօր ի հիացման իւրում երանելին Յովաննէս, « տեսէք որպիսի սէր շնորհեաց մեզ Հայր, զի որդիք « Սատուծոյ կոչեսցուք, և եմք <sup>(42)</sup>: »

Եւ ո՞վ որ ոչ և աստանօր սքանչացի ընդ լրումն աստուածայնոցն զթասիրութեանց. զի ահա ի փարատել յայսմ մասին զամենայն կասկած երկիւղի խարէութեան և պատրանաց՝ նա ինքն Որդին Սատուծոյ բարձրելոյ արժան համարեալ հաւանել ընդ մերս որդեգրութիւն, ոչ ամօթ համարի անուանել զմեզ եղբայրութեանն քաղցր անուամբ՝ այն ինչ հանդերձեալ համբառնալ յերկինս և փառաց ի փառս բարձրանալ. « Երթ զու առ եղբարսն « իմ և ասա ցնոսա՝ ելանեմ ես առ Հայրն իմ և առ « Հայր ձեր, և Սատուածն իմ և Սատուած ձեր <sup>(43)</sup>: » Ո՞վ սքանչելահարաշ բանիցն. արժան է հալել սրտից, Եղբարք, ի լուր այսքան և այսպիսի սիրոյ. « Տեսէք « որպիսի սէր շնորհեաց մեզ Հայր, զի որդիք Սատուծոյ « կոչեսցուք, և եմք: »

Բայց և քանի՞ օն աստի նորանոր զօղուածք զորովալից ընտանութեան ի մէջ մարդկան: Որդիքս յերկրի՝ միոյ հօր ճնունդք Սղամայ, որդիք եմք և միայնոյ Հօր երկնաւորի որ է Սատուած. ապա ուրեմն կրկնակի եղբարք

ընդ միմեանս, նոյն և կրկնակի ընդ Քրիստոսի եղբայրակիցք :

Բարէ . եթէ մէն մի յիմոց նմանեաց եղբայր իմ է ըստ այսքանեաց զլիտոց , և եթէ այսչափ պատուասիրեալ է յԱստուծոյ , և եթէ Ներկինք այնչափ պատիւս և այնպիսիս յաւել ի նա մեծութիւնս , ո՛րքան պարտիս ի վերայ իմ կապիցէ եղբայրութիւն այսպիսի :

Հարկ ուրեմն է ինձ սիրել զմարդ , զտառապեալն , զկարօտեալն , ո՛ր ոք և իցէ , ոչ միայն իբրև զիմ նմանակից , իբրև զարարած իմացական և աստուածաստեղծ , որ յանձին բերէ ի բնէ գնկարագիրս ինչ Աստուծոյ եղծեալս ըստ մասին , այլ և իբրև զնորին պատկեր կենդանի՝ աստուածայնովն նորոգեալ ձեռամբ , և զնով արեանն իւրոյ փրկանաւորեալ :

Հարկ ուրեմն է սիրել ինձ զնա , ոչ միայն զի եղբայր իմ է ըստ բնութեան կարգին՝ իբրու նորին մարդկեղէն ազգի սերունդ , այլ զի և նա և ես աստուածային իմն ունիմք ազգակցութիւն՝ իբր ի բարձրագոյն և ի զլիսաւորագոյն կարգի եղբայրակիցք :

Հարկ ուրեմն է ինձ զարձեալ սիրել զնա իբրև զՔրիստոսի եղբայր և նորին յերկինս ժառանգակից , իբրև զԱստուծոյ որդի՝ չրաւիրեալ ի թաղաւորել ընդ նմա և ընդ իս ի փառան իւրում . կամ թէ սիրել զԱստուած ի ի նմա , և զնա յԱստուած՝ նովին ներդործութեամբ սիրոյ <sup>(44)</sup> և եղբայրական խանդադատանօք :

Սյս է անա քրիստոսականն եղբայրութիւն , և հոգի

նորին և խսկութիւն և կատարումն Սէրն է, որպէս  
և տեսէք : Սէրն, ասէ անարեալ, կատարումն տայէ  
Եզրայրութեան ձերում . « Եզրայրսիրութեամբն զսէր : »

## ԺԲ

Զկորնթացիսն յեզրայրսիրութիւն յորդորելով ասու-  
քեալն Պօղոս, զիտէք՝ ասէր՝ զգթութիւն Տեառն մերոյ  
Յիսուսի Քրիստոսի, զի որ մեծատունն էր՝ վասն ձեր  
աղքատացս, զի զուք նորա կամաւոր աղքատութեամբն  
մեծասլիք :

Յորժամ ոչ ի սիրոյ առնիցի ողորմութիւն՝ խոնարհե-  
ցուցիչ է . վասն որոյ ի բաց մերժեմ ես զոր ինչ է զի  
խրոխտանօք իմն և ի ցոյցս տայցես, և է զի ի հարկէ և  
կամ տրամութեամբ : Իսկ եթէ յանկեղծ մտաց և զուարթ  
երեսօք զիջանիցիս աս իս, որպէս Եզրայր Եզրօք ձեռն  
տու, եթէ յատաջ քան զպէտան իմ զսիրտ քո տայցես  
ինձ, սիրտ իմ ընդարձակի և ի քոյզ սիրտ ընթացեալ  
զեզու : Ոչ ես ծանր է ինձ քոյոցդ ընչից լինել հաղորդակից  
մասամբն այնու՝ թէպէտ և յոյժ իսկ զուզնարեալ իցէ,  
քանզի կանխեցիր զու և ընկալար զիս ի կցորդութիւն  
սիրոյ քո և զթութեան : Այո արգարե, եթէ կամիս զի  
անարատ պահեցից ես զպատիւ իմոյ մարդկութեանս, և  
մի նուաստացայց ի քոց պարզեաց, հարկ է քեզ հուա-  
սարութիւն իմն ի մէջ արկանել սիրով ընդ իս և ընդ քեզ,  
զոր օրինակ և երանելին Յակովբոս յայտ առնէ յիրումն



հրաշալի թղթին զհաւասարութիւն որդոցն Աստուծոյ :

Զսոյն և Որդին Աստուծոյ արար . զի մինչև ողորմութիւն արարեալ ազգի մարդկան , և ձեռն օգնութեան կարկառեալ նմին , և այնքան բարիս առատաձեռնեալ , մերկացաւ զփառս իւր զի մօտագոյնս մերձեցցի առ մեզ : Եղև նախ Որդի մարդոյ , եղբայր մեր յԱդամ , և յետ եղբայրանալոյն ընդ մեզ և հաւասարելոյ՝ ապա և զանձն իւր բովանդակ ետ մեզ . քանզի ետ մեզ զսիրտ իւր , զյօժարութիւնս իւր , զողի և զխորհուրդս իւր , զմարմին իւր և զարտասուս , զքիբան և զփաստակս , զկեանս իւր և զմահ , զմարդկութիւն իւր և զաստուածութիւն , զամենայն մխիթարութիւնս աւետարանին իւրոյ , զամենայն զշնորհս խորհրդոցն իւրոց , զամենայն օրինակս առաքիւնութեանց և վարուց իւրոց , զամենայն ճոխութիւնս ողորմութեան իւրոյ , և զամենայն զանձս յաւիտենականութեան իւրոյ :

Եւ արդ յորմէ՛ նետէ վերստին ծնայ ես նովաւ , ոչ միայն պարտ է ինձ պատուոյ մարդկութեանս իմում զզուշանալ ի գնացս իմ ընդ մարդկան , այլ մանաւանդ քեզ արժան է՝ ո որ և իցես դու՝ զգոյշ կալ յանարգելոյ զպատիւ քրիստոնէութեան իմոյ : Պարտ է քեզ յիմումս քրիստոնէութեան մեծարել զիմս թաղաւորութիւն իրբև զորդոյ Աստուծոյ , և յաղքատութեան իմում գնախնին իմ իրաւունս ի ժառանգութիւն երկնիցն երանութեան :

Ապա ուրեմն ես որ Քրիստոնեայս եմ՝ և Աստուծոյ որդեգիր , եղբայր Քրիստոսի , ժառանգորդ արքայու-

թեան երկնից, չկարեմ ըստ արժանւոյն ընդունել ինչ  
եթէ ոչ Սատուծոյ և կամ յանուն նորա. զի ի նմանէ եւեթ  
կարող եմ ես հայցել առանց նուաստանարայ. և յորժամ  
առ քեզ դիմիցեմ ավուփանս ինչ վշտաց իմոց գտանել,  
իրբև առ պաշտօնեայ Տեսչութեանն Սատուծոյ դիմեմ և  
առ մատակարար դանձուց նորա. աւանդապահ՝ եւեթ ես  
դու պարզեաց նորա :

Սմին իրի իսկ Եղբարք, և աղքատն քրիստոնեայ  
յանուն Սատուծոյ հայցէ զողորմութիւն և վասն սիրոյն  
Աստուծոյ. և զոր հայցէն ի նմանւոյ իւրմէ ի ճոխագունէ  
քան զինքն՝ յանուն Աստուծոյ, ոչ այնչափ նիւթականն  
է նպաստ, որչափ եղբայրսիրութեանն վկայութիւն.  
« Յանուն Աստուծոյ, ասէ, արա Սէր. » այսինքն է  
սիրեա նախ, և ապա ողորմեա :

Այլ ասիցէ որ արդեօք, ոչ ինչ կարի անիրաւին ուրեմն  
որք խորշին մերժին յողորմութենէ իրբու յանարգութենէ  
ուստեք :

Յիրաւի էնոցա խորշել յերեսաց հնոյն ողորմութեան,  
զոր իմաստասէրքն առաջինք և հեթանոսք առնէին, և  
յերեսաց լոկոյ մարդկային ողորմութեան՝ որ ի սնա-  
պարծիկն առատաձեռնութենէ դայ յառաջ և կամ յտան-  
հարու գթասիրութենէ: Այո, այն ողորմութիւն՝ որ  
պարզե է մարդոյ առ մարդ, յանուն սոսկ մարդոյ,  
նուաստութիւն է ընդունողին, և ամենայն անձն որ  
սակաւ մի ազնուութիւն ունիցի՝ ոչ կամեսցի և ոչ  
փշրանս ինչ առնուլ անտի: Բայց անիրաւին եթէ

խորշիցին յողորմութենէ որ յանուն Աստուծոյ հայցի, և յաստուածակոյս կողմանէ անտի շնորհի. անիրաւին ընդդէմ քրիստոնէական Սիրոյ, և եթէ խորշին ի նմանէ՝ պատճառք այն են զի չճանաչեն զնա :

Ոչ այդպէս. աստուածականն ողորմութիւն, պարզին Աստուծոյ ի ձեռն Քրիստոսի, և տուրք մարդոյ ի ձեռն սիրոյ, և զի միտիս անզուգական բառիս զամենայնն բովանդակեալ ասացուք՝ Սէրն, ոչ նուաստացուցանէ երբէք, այլ մանաւանդ բարձրացուցանէ և առտել ևս միաւորէ զմարդիկ : Քանզի ո՞ր որդի է որ ոչ պարծեսցի՝ պարզեա ի հօրէն ընդունելով, և յայնպիսոյ Հօրէ, իրրու սիրոյ նորին և զորովոյն զբաւականս : Եւ այլազոչ ևս. զի ա՞րդ ոչ յաւելուցու համաշունչ միաբանութիւն եղբարց՝ յորժամ հաւասարագոյնս, և մանաւանդ մտաղիւրագոյնս բաշխեսցին պարզեք հօրն առ որդիս :

Եւ անա այս է յեկեղեցւոյ Քրիստոսի ձեռնտուութիւն եղբարց, աւետարանականն սատարութիւն, Ողորմութիւնն քրիստոնէական. և եթէ անունդ այդ ծանր է լսելեաց զփափկութեան՝ իրբև ամօթապարտ ինչ իրաց յուշարար՝ սրտաքոյ քրիստոսական հաւատոց, վսեմագունին կոչեա զնա և սեպհականագոյն անուամբն, որ է Սէր աստուածեղէն :

## ԺԳ

Զամենայն ինչ սկսաւ առնել Յիսուս, և սպա բառացանել<sup>(45)</sup> :



Զեղբայրական սիրոյն ևս օրինակ ետ մեզ Փրկիչն ,  
Եղբարք . և մնայր զպատուիրանն յարդարել՝ մինչև  
կատարեալ նորա զպատարագն : Ասան որոյ յառաջա-  
գոյն քան զմահ իւր ասէ ցաշակերտսն . « Որդեակք իմ ,  
« Վորքք միւս ևս ժամանակ ընդ ձեզ եմ : Պատուիրան ևոր  
« տամ ձեզ , զի սիրեսջիք զմիմեանս որպէս և ես զձեզ  
« սիրեցի <sup>(46)</sup> : » Եւ յետ սակաւ միոյ դարձեալ հաստատէր  
Փրկիչն մեր զաստուածայինն զիւր օրինադրութիւն  
Սիրոյ և ասէր . « Այս է պատուէր իմ զի սիրեսջիք զմիմեանս  
« որպէս ևս զձեզ սիրեցի <sup>(47)</sup> : » Եւ առ ի քաջ խելամուտս  
տունելոյ զնոսա առաքինութեանն զոր պատուիրէր նոցա ,  
յաւել վաղվազակի և զայս պարզաբանութիւն , որով ևս  
քան զես սլայծառանայ տիրագոյնն ի տիպս կերպարա-  
նաց նորին . « Մեծ ևս քան զայս սէր ոչ որ ունի , ասէ ,  
« եթէ զանձն իւր զիցէ ի վերայ բարեկամաց իւրոց : » Բեր  
արդ խորագոյնս միտ զիցուք բանից սիրայնոյ կտակիս :  
Եւ նախ զի՞ է զի այնպէս խօսի աստէն զՍիրոյ  
Քրիստոս՝ որպէս եթէ սամիայն իցէ պատուիրան իւր , և  
այլ ինչ չիցէ պատուիրեալ . « Ո՛հ , ասէ մեծն Գրիգոր ,  
« քանզի այլ ամենայն պատուիրանք ի Սէր անդր  
« վերբերին իբրև յիւրեանցն ծագումն , և ամենայն զոր  
« ինչ պատուիրեաց Փրկիչն յաւետարանին իւրում՝  
« զՍիրոյն Աստուծոյ և զընկերին կախեալ կայ , զոր  
« օրինակ և ոստք և կողերք ծառոյն ի միոջէ բնոյ անտի  
« արձակին և զմի արմատ հասարակաց ունին <sup>(48)</sup> : »  
Տեսանէ՞ք , Եղբարք իմ սիրեցեալք , եթէ զիա՛րզ համա-

ձայն է այս մերոցս բանից զորս ճոխարարյայտ արարաւք :

Եւ երկրորդ անգամ, եթէ կամիցիմք բարւոք ի միտ առնուլ զխորհուրդ բանիցն Քրիստոսի, միտ զիցուք երեցունցս այսոցիկ իրաց :

Նախ զի պատուիրաննոր է սա, ապա ուրեմն և որիչ ի հնոյն զոր քարոզեացն Մովսէս : Մովսիսեանն պատուիրանն զայս ասէր. « Սիրեսցես զընկերքո իբրև զանձնքո : »

Արգարութիւն է այս լոկ, և մարդկեղէնս բնութիւն մինչև ցայնժամ ոչ հանդարտէր առաւելագոյն սիրոյ : Իսկ Քրիստոսի պատուիրանն զի՛նչ. « Սիրեսջիք, ասէ,

« զմիմեանս՝ որպէս ես զձեզ սիրեցի. » այս ինքն է՝ ըստ իմիք առաւել ևս քան զանձինս : Կատարումն է այս և ձագ սիրոյ, բայց օգնականութեամբ շորհացն Աստուծոյ ոչ ի վեր է քան զզօրութիւն առն քրիստոնէի :

Երկրորդ անգամ, զի պատուիրանն Քրիստոսի է սա, առանձինն նորատակ իւրոյ զալտեանն յաշխարհս, և իբրու իսկութիւն վարդապետութեան նորա : Ապա ուրեմն Սէրն զուստր է Քրիստոսի, և պատուէր սիրոյ ընկերին՝ իւր իսկ սեպհական պատուէր է :

Զիք կրօն յաշխարհի որ կարող իցէ իւր ասել զնա, և ոչ իմաստասիրութիւն որ անձին արգասիս համարիցի զնա :

Երրորդ անգամ, զի օրինակ սիրոյն մերոյ ինքնին Քրիստոս է, որ այնչափ սիրեաց զմեզ՝ մինչև զանձն իւր եղ ի վերայ մեր :

Վասն որոյ և զու պարտիս սիրել զընկերքո՝ ոչ միայն զինչսքո և զհանգիստ և զառողջութիւն նուիրելով առ սէր նորա, այլ և զկեանս անձինզ

տալով վասն նորա ի փրկութիւն նոցոյ նորին, ոչ ինչ բնաւ խնդրելով փոխարէն՝ ոչ զընտանեաց քոց մեծութիւն, և ոչ զանուանդ քո զփառս, այլ միայն վասն սիրոյն Աստուծոյ և սիրոյ ընկերին :

Սասանի արդեօք արիութիւն քո, և վարանի սիրտ քո... Հայեաց ի Քրիստոս ի նախատիպն քո. նա ընդ օրինակին տայ քեզ և շնորհս նմանող իւր լինելոյ : Ընդարձակեա ուրեմն զողիդ քո ի շունչ իւրումն ոգոյ : Ա՛հ, նորայն սէր ոչ ի Հրեայսն սահմանի, ոչ յիմաստունս և եթ և ոչ յարս բարիս ամիտիի, այլ առ ամենայն մարդիկ տարածի, առ մեղաւորսն որպէս և առ արդարս, առ ամբարիշտան որպէս և առ բարեպարիշտ հաւատացեալս, առ թշնամիսն իւր սխերիմս որպէս և առ բարեկամսն և աշակերտս : Այո, և առ թշնամիսն իւր ևս : Յետ այնչափ քաղցր բանիւք յորդորելոյ զնոսա, յետ այնչափ բարիս առատածեւոնելոյ առ նոսա, նուիրեաց վասն նոցա և զկեանս անձին իւրոյ՝ զպատուականագոյնն քան զկեանս ամենայն : Այլ աղէ ի խաչին իսկ տեսէք զնա... Մինչչև աւանդեալ զողին՝ յաղօթս կայ անսահման զթասիրութեամբ վասն իւրոցն, մատուցանելով Հօր իւրում ի քաւութիւն մեղաց նոցին զայն արիւն՝ զոր ձեռք նոցին աստուածասպանք հեղուին :

Յաղազս այսորիկ և երանելի առաքեալն Յովնաննէս գոչէ առ նորս աշխարհ. « Այսուիկ զիտացար զսէրն « Աստուծոյ, զի նա զանձն իւր եղ վասն մեր. և մեր « վասն եղբարց մերոց պարտիւք զնկ զանձինս <sup>(49)</sup> : »



Այս հոգի սեճնանուէր սիրոյ՝ հնոյն աշխարհի անձանօթ տեսէք յոր ժամանեալ է սահման. այս է յաղթանակ, սոյն և կատարումն Սիրոյ :

### ԺԳ

Եւ արդ աւանիկ և այլ իմն տեսարան մեծ և սքանչելի՝ պարզեալ յԱստուծոյ առաջի բանականացս սեռի ի վախճան ժամանակաց, ի վերայ աշխարհիս աւերակաց, յորժամ վարադոյր՝ եթէ օրէն իցէ ասել՝ Աղքատութեանն Խորհրդոյ ի բաց վերացցի, և տեսանիցէք ձերովք իսկ աչօք զոր ինչ սարսափելի և միանդամայն սխրալի և դ Բարձրեալն յօրէնս անդ Սիրոյն : Լուարուք. Քրիստոս ինքն է որ ասէն .

« Եւ յորժամ եկեսցէ որդի մարդոյ փառօք իւրովք՝ և  
« ամենայն հրեշտակք ընդ նմա՝ յայնժամ նստցի յաթոռ  
« փառաց իւրոց : Եւ ժողովեսցին առաջի նորա ամե  
« նայն ազդք, և մեկնեսցէ զնոսա ի միմեանց, որպէս  
« հովիւ զի մեկնեսցէ զօղիս յայճեաց : Եւ կացուցէ  
« զօղիսն ընդ աջմէ իւրմէ՝ և զայժիսն ի ձախմէ :

« Յայնժամ ասացէ թագաւորն ցայնոսիկ որ ընդ  
« աջմէն իցեն. ևկայք օրհնեալք Հօր իմոյ, ժառանգեցէք  
« զպատրաստեալ ձեզ զարքայութիւնն ի սկզբանէ  
« աշխարհի :

« Զիքաղցեայ և ետուք ինձ ուտել, ծարաւեցի և արբու  
« ցիք ինձ, օտար էի և ժողովեցիք զիս, մերկ և զզեցուցիք  
« զիս, հիւանդ էի և տեսիր զիս, ի բանտի էի և եկիք առ իս :

« Յայնժամ պատասխանի տացեն նմա արդարքն և  
« ասացեն . Տէր , ե՞րբ տեսաք զքեզ քաղցեալ և կերաւ  
« կրեցաք , կամ ծարաւի և արբուցաք . ե՞րբ տեսաք  
« զքեզ օտար և ժողովեցաք , կամ մերկ և զզեցուցաք . ե՞րբ  
« տեսաք զքեզ հիւանդ կամ ի բանտի , և եկաք առ քեզ :  
« Պատասխանի տացէ թաղաւորն և ասացէ ցնոսա .  
« ամէն ասեմ ձեզ , որովհետեւ արարիք միում յեղբարցս  
« այսոցիկ փոքրկանց ` ինձ արարիք :

« Յայնժամ ասացէ և ցայնոսիկ որ ընդ անկէն իցեն .  
« երթայք յինէն անիծեալք ի նորն յաւիտենական , որ  
« պատրաստեալ է սատանայի և հրեշտակաց նորա :

« Զ ի քաղցեայ և ոչ ետուք ինձ ուտել , ծարաւեցի և ոչ  
« արբուցիք զիս . օտար էի և ոչ ժողովեցիք զիս , մերկ  
« էի և ոչ զզեցուցիք զիս , հիւանդ և ի բանտի ` և ոչ տեսիք  
« զիս : Յայնժամ պատասխանի տացեն և նորա և ասաւ  
« ցեն . տէր , ե՞րբ տեսաք զքեզ քաղցեալ կամ ծարաւի  
« կամ օտար կամ մերկ կամ հիւանդ կամ ի բանտի , և  
« ոչ պաշտեցաք զքեզ : Յայնժամ պատասխանի տացէ  
« նոցա և առացէ . ամէն ասեմ ձեզ , որովհետեւ ոչ արարէք  
« միում ի փոքրկանցս յայսցանէ , և ոչ ինձ արարէք :

« Եւ երթիցեն նորա ի տանջանսն յաւիտենականս , և  
« արդարքն ի կեանսն յաւիտենականս : »

Այս է աւասիկ զոր խորհուրդ աղբատուքեան կոչեցաք :  
Հապա անջիր զմտաւ դաշն որ ծածկեալ ասէ զանձն իւր  
ի միում ի փոքրկանցդ յայդցանէ եղբարց , զթացիր ի  
Քրիստոս ` որ թաղուցեալ կայ ի չքաւորն աղերասրկու

առ քեզ, և պատկառեաց ի մեծվայելչութենէ անտի  
Աստուծոյ որ ընդ զրգրեկան ծածկի: Մի՛ երբէք մոռաս  
ցիս զի խնդիրն դատաստանի ի մեծի արուր հատուցման  
գործոց յայնմ է բովանդակ, յայնմ միայն՝ եթէ Ջիա՛րդ  
կատարեցեր զօրէնս ողորմածութեան առ եղբարս քո:

Բայց անաւատիկ և անտուածային յիշարեւ սիրոյն պա-  
տուիրանի: Օրէնսդիրքն մարդկայինք փոխարէնս օրինաց  
իւրեանց զպատժոցն և եթ իշունն սպառնալիս, իսկ  
աստանօր ոչ այնպէս, այլ ըստ նմին համեմատութեան  
տեսանեմք և զվարձուցն հատուցումն առննթեր պատու-  
հասին, յաշտեմեակն ուրախութիւն պատուիրանապա-  
հացն, նոյնպէս և պատուիրանազանցիցն տանջանք  
յաշտեմեակն: Այսպէս կամեցաւ զերազոյնն հաւասա-  
րութիւն, այսպէս վճիռ ետ տիրականն արդարութիւն:

Մարսեցարուք ուրեմն լուծիչքդ աստուածայնոյ պա-  
տուիրանին, այլ ողորմածքդ ցնծացէք և ուրախ լերուք:

## ԺԵ

Այսոքիկ են անա, Եղբարք սիրեցեալք, բազմաբեղուն  
արդասիք, և պտուղք կենդանութեան, մեծութիւնք,  
վսեմութիւնք, պերճութիւնք, կամ թէ որպէս երանելին  
Պօղոս ասէ՝ լայնութիւն և երկայնութիւն, բարձրութիւն  
և խորութիւն, ամենայն չափք աստուածայինք բրիս-  
տոնէական Սիրոյն:

Ապա ուրեմն Սէրն բրիստոնէական, իբրև առարինու



թիւն որոյ կէտ նոյառակին է Աստուած և ընկերն միան-  
 դամայն, յայտառնէ ըստ ծայրագոնին իւրումնչանակու-  
 թեան զմարդասիրութիւն, զեղբայրսիրութիւն, զողոր-  
 մածութիւն, այլ և աւելի ինչ ևս յոյժ քան զայս ամենայն.  
 զի յայտ առնէ սիրել զընկերն իբրև զանձն, և ըստ  
 եղանակս ինչ՝ առաւել իսկ քան զանձն, յԱստուած և  
 վասն Աստուծոյ. այս ինքն է սէր մարդկային աստուա-  
 ծարեալ, սէր զերրնական, սէր ընդհանրական, սէր  
 գորովալից և արդիւնական: Քանզի Սէրն Քրիստոսի  
 յինքն բովանդակեալ ունի ոչ միայն զներքին և զիսկական  
 զգացմունս առաքինութեանցս այսոցիկ բարոյականաց՝  
 ի վեր քան զբնութիւնս ազնուացելոց, այլ և զամենայն  
 դայանութիւնս նոցին արտաքինս, զամենայն զգործս  
 որ ապացոյցք են նոցին շօշափելիք, այն իսկ են մխի-  
 թարութիւն տառապանաց հոգւոյ և մարմնոյ, ազգի  
 ազգի բարեգործութիւնք՝ ոլորմածութեան յայտարարք,  
 նպաստաւորութիւնք զանազանք, պաշտպանութիւն  
 կարօտելոց, ճրիատուր հրահանգք, խրատք պիտանիք,  
 սփոփանք ի վիշտս, քաջալերութիւնք ի յուսահատու-  
 թիւնս, ազգարարութիւն եղբայրական, շինութիւն օ-  
 րինակի բարւոյ, համբերութիւն, զթութիւն, նեղութիւն,  
 քաղցրութիւն խօսից և գնացից, ներողամտութիւն առ  
 թերութիւնս այլոց, թոյլատուութիւն անձանց և կարծեաց,  
 երկխոյ յամօթ առնելոյ և վշտացուցանելոյ զընկերս,  
 անիրաւութեանց մոռացումն, խաղաղութեան և միա-  
 բանութեան սէր, հրաժեշտ յանձնական օգտից, յօղուտ

այլոց տալ զանձին զհաճոյս, զինչս և զկեանս անգամ՝ ի հանգամանս ինչ կենցաղոյս յորս կամք իցեն Տեառն զնկ զմարդ առընթեր նմանեաց նորին :

Այս է աւասիկ Սէրն, դարձեալ ասեմ. սա է գետն կենդանարար որ արբուցանէ զերկիր՝ զի պտղաբեր լիցի Աստուծոյ, և պտղոցն սերմանք՝ ի Քրիստոսէ արկեալ ի սիրտ նորա, զանձք առաքինութեան, մեծութեան բարուց, զօրութեան և յաջողութեան, զորս կամեցաւ Աստուած յօգուտ առն առն և հասարակաց՝ անանջատս առնել ի պահպանութենէ պատուիրանին և զբայրսիրութեան :

## ԺԳ.

Առաքեալն Սիրոյ աւետարանիչն Յովհաննէս, որպէս ի պատմութիւնս ունիմք աւանդեալ, լի արդեամբք փաստակոց հասեալ ի խոր ծերութիւն, տայր տանել զանձն իւր ի ժողովս հաւատացելոց, և զի ոչ ևս կարէր ճառս երկայնաձիղս արկանել՝ շատ համարէր կրկնել և երեքկնել զորովագութ սիրով զբանն զայն Փրկչին՝ եթէ « Որդեակք իմ, սիրեսջիր զմիմեանս : »

Չանձբացեալ իմն աշակերտացն ի լուր հանապազօրոյ կրկնութեան նոցին բանից՝ հարցին ցնա յաւուր միում և ոսնն. « Վարդապետ, զի՞ է զի զնոյն բան ասես հա՞ « նապաղ : » Ետ պատասխանի երանելին, արդարև սիրոյն աշակերտ. « անզի պատուէր Տեառն է որդեակք, և եթէ այս միայն իցէ՝ բաւական է <sup>(50)</sup> : »

Այո, արդարև բառական է այս և մարդոյ սոսկականի, և մարդկեղէն ընկերութեան, և ի կենցաղոյս պէտս, և սակս հանդերձեալ կենաց, զի սա է կատարումն, սա երանութիւն, և սոյն լրումն վախճանի մարդոյ :

Ո՛հ, եթէ ամաք թխպայորդք որ ի բազում ժամանակաց հետէ մրրիկս աշխարհի սպառնան չպատուէին երբէք երբէք ի փայլատականց աստուածայնոյ սիրոյն . եթէ Աստուած՝ մշտնջենաւորն վառարան այնր սիրոյ՝ չպահսպանէր զայն խնամով ի վերայ երկրի ի ծոց իւրոյ Եկեղեցւոյն, և եթէ չիջանէր խափնոյր այն ի հողիս, յիրաւի էր մեզ յուսահատ լինել ի փրկութենէ մարդկայինս ազգի : Սակայն եկեացէ ժամանակ, և մերձ իսկ է, որպէս թրախամիտ յուսով ակն ունիմք, զի ծանուցեալ մարդկան զխոտորումն իւրեանց, և տեսեալ զի անգոր են հնարք քաղաքականութեան իւրեանց ի հաստատութիւն ընկերական բարեկարգութեան, մօտազոյնս մերձեցին առ Քրիստոս՝ ընդունել ի նմանէ զկենդանութիւն զոր եբեր նա յաշխարհս և մասնաւորէ աշակերտաց իւրոց ի ձեռն Սիրոյ : Յայնժամ ապա սքանչացին ամենեքեան ընդ չքնազն տեսարան զոր քրիստոսականս կրօնք տացեն աշխարհի, ՚իացցին ընդ մի միայն ընկերութիւն միաբանեալ ի մի և եթ դաւանութիւն հաւատոյ, ի նոյն սէր եղբայրական, ի նոյն սիրտ և ի նոյն հողի, զերկնից բերելով աստէն յաշխարհիս պատկեր :



Այո՛, սիրեցեալ Եղբարք, ունիմք Մեր զայս յոյս բերկրական, և օրքան զօր աճելով աճէ սա ի սիրտս մեր: Այլ և յոչ կամաց արտաքս անտի վաղեալ ի մեծ հրճուանքս ուրախութեան փոխի յորժամ տեսանեմք որչափ ինչ գործ գործի վասն սիրոյն Աստուծոյ և ընկերին ի մեծի յայսմ քաղաքիս՝ յոր սլարծի Գաղղիա, որ (ըստ այլոցն իսկ ազգաց ասելոյ) քաղաքամայր է բարգաւաճութեան աշխարհի՝ և գիտութեանց և դպրութեանցն փառօք, և բնակչացն քաղցրաբարոյ բարեկարգութեամբ, և զոր մարթի մեծաւ իրաւամբ քաղաքամայր սիրոյ և ողորմութեան ևս անուանել՝ սակս անհամար բազմութեան օթեանացն գթութեան, աւետարանական բարեզործութեան, և բիրազգի սուաբնութեանց:

Ընթացարուք ընդ աշխարհ՝ ամենայն, ի հիւսիսոյ մինչև ի հարաւ, և ի մտից մինչև ի յելս արեւու, և ցուցէք մեզ՝ թէ կարող իցէք՝ տեղի մի յորում աւելին ճոխութիւն այսքանեաւ առատութեամբ և այսպիսեօք հարտարահնար յեղանակօք սփռիցի ի վերայ տառապանաց մարդկան: Ոչ ուրեք բաշխին տուրք առատագոյնք և շառագոյնք քան աստէն. և մանաւանդ ոչ ուրեք լաւազոյնք, այս ինքն ոչ առաւելագոյն ուրախութեամբ տուեալք և ոչ փափկազոյն ընտրողութեամբ: Այո՛, Եղբարք սիրեցեալք, յեղանակն իսկ առնելոյ զսէր և զողորմութիւն,

որպէս և առաքեալն վկայէ, մեծապէս ազգու գործէ  
դայն և արդիւնական <sup>(54)</sup> : Աստանօր քան այլ ամենայն  
ուրեք՝ անհրաժեշտն անհաւասարութիւն ընչից և սլայ-  
մանի կենաց՝ թուի անհետ լինել, կամ թէ գէթ հաւա-  
սարութիւն ինչ առնու ըստ կարի՝ յանշահատէր և ի  
զուարթառատ բաշխմանէ տրոց, ի զթասիրական  
հնարից, ի սիրալիր աճապարանաց, ի զորովական  
մտազիւրութենէ, յամենայնէ որ զինաթափ առնէ զհա-  
խանձ, և ի համբոյր հաշտութեան ածէ զմարդիկ :

Փարի՛զ, քաղաք հրաշալեաց, քաղաքամայրդ անզու-  
ղական, որ ինչ ինձ զարմանալին է ի քեզ՝ ոչ ապարանքդ  
են ոսկէզօծք, յորս մեծութիւնք մարդկեղէնք դարուց ի  
դարս զմիմեանս յաջորդելով՝ հանդերձ յիշատակօքն  
իւրեանց և զհետս մեծվայելչութեանցն թողին, ոչ թան-  
գարանքդ այգոքիկ յորս խնամօք արանց իմաստնոց  
հանդիսացեալ սիոնն առաջի ակնկառոյց տեսողաց՝  
աստէն արդիւնք զանազանեալ ցեղապետութեանց բնու-  
թեան, և անդանօր հրաշակերտք արուեստից և ճարտա-  
րութեանց, ոչ կոթողն այն որ յերկնաբերձ ծայրին բար-  
ձեալ ունի զՂնքնակալն մեծ՝ օճապտոյտ կամարան  
պղնձեաւ յորում քանդակեալ կան ի հիացումն ասպազայ  
դարուց պատերազմունք, յաղթութիւնք և աշխարհա-  
կալութիւնք, որովք լի և պատարուն է պատմու-  
թիւն վարուց առնն, մին ի հրաշավէպ պատմու-  
թեանց աշխարհի, և ոչ կամարն այն յաղթութեան  
կանգնեալ ի փառս մեծի բանակին, քան զամենայն

զ'ունդունատիպ յիշատակս վաղեմիս գերագանց , որոյ պատկն լի պատերազմական մրցանակօք՝ թուի իմն ի բացուստ ընդ աստեղազարդն երկինս խառնեալ :

Որ ինչ մեղ զարմանալին է քան զամենայն , որ ինչ հիացուցանէ զմեղ և յաիշտակէ զմիտս մեր , տեսարանն է՝ դարձեալ ասեմ՝ այնր զործունեայ և անխոնջ Սիրոյ որ բազմանալով բազմանայ ընդ ամենայն կողմանս մեծի քաղաքիս , հասանել յօգնութիւն կարօտելոց , ախտաժեւտաց , ծերոց , տկարաց , որբոց , տղիտաց , մոլորելոց , լքելոց , կուրաց , խլից և համերց , մտաթափից , բանտարկիւոց , գատապարտելոց , և առ հասարակ ամենեցուն որ մատնեալ իցեն յաղէտս ախտից կամ թշուառութեան , կառուցանելով յանուն Տեառն Յիսուսի բնակարանս հոյակապս ի պէտս չքաւոր և վշտըմբեր մարդկան , հիմնելով հիւանդանոցս և սղքատանոցս , հաստատելով զանձանակս բարերարութեան , բանալով վայրս բաշխելոյ զողորմութիւն , կանգնելով տունս ապաստանի , զպրոցս օժտելով , մանկավարժոցս բանալով , մտրս կազմելով , և ի բազմապատիկ օթեանքս յայտոսիկ կանգնեալս յիւրմէ աստուածպաշտութենէն՝ ժողովելով զամենայն տկարութիւնս հոգեկանս և մարմնականս . ոչ ի հրապարակել առաջի աչաց իմաստնոց իբրու հետաքննութեան և հրահանգաց ինչ ճարակս , այլ ի խնամել զնոսին , ի մխիթարել , և ի բժշկել՝ եթէ իցէ հնար , ի զործ արկանելով զամենայն զհնարս արուեստին , և ծախելով արծաթ և հոգս բազում :



Այսօրիկ են ա՛նա ապարանք և թանգարանք Կրօնից, որ առընթեր իւրոյն տաճարաց այնպիսեաւ փայլեն պայծառութեամբ՝ դի ամենայն փառք երկրի աղօտք են առ նո՛վաւ և նսեմք :

Բա՛րէ, քանի՛ բազուկք արիականք, քանի՛ սիրտք ազնուականք, քանի՛ բարեպաշտիկ ընկերակցութիւնք են որովք ի դարման այս ամենայն չարեաց նա՛նատակի Սէրն : Թող զհանրականսն ընկերակցութիւնս որ յամենայն ի թաղս Փարիզու սփռեալ՝ խոյզ և խնդիր առնեն թշուառութեան՝ յո՛ր կերպարանս և գտանիցի, ճայն տալով առ մէն մի յաղետից կենցաղոյս առ ի բառնալոյ կամ՛նուագելոյ, և կամ առ ի թովելոյ իմն զնոսին աստուածայնովքն իւրեանց մխիթարութեամբք : Ե՛ն են և ի յողովրդապետութիւնս իւրաքանչիւր առանձինն գործը ողորմութեան . և քահանայք նոցին, որք առ հասարակ թելադիրք և կենսատուք են ամենայն արդեանց սիրոյ և իրրու կեզրոնք նոցին և մշտաբոբբոք վառարանք, հասունեն փութանակի յօգնութիւն կարևորագոյն պիտոյից աղքատաց և տառապելոց յայսմ մասին մերոյս հաւատարիմ հօտի : Յանհնարիցն է մեզ ի թիւ արկանել աստանօր մի բստ միոջէ զընկերակցութիւնսն զայնոսիկ և զողորմութեան գործս . և որ տպագրի զարգիս մերովս հրամանաւ ցուցակն և եթ նոցին՝ հանդերձ կանոնացն իւրաքանչիւր պատմութեամբ, թէպէտ և փոքր քանակաւ կազմեսցէ մատեան, այլ եղիցի մի ի զեղեցկագունիցն արձանաց յիշատակի կանգնելոց ի փառս Սիրոյն Քրիստոսի :

Եւ զիա՞րդ մարթաացուք ասել ձեզ, Եղբարք, զբազմութիւն արանց և կանանց յամենայն կարգէ և յամենայն հասակէ որ դործոցս ողորմութեան լինին զործակիցք: Եւ նախ առաջին Հովիւքն հողոց, որ յետ հողերական հացիւ զտառապեալ խաշինան կերակրելոյ՝ բաշխեն ի նոսա երբ կարող իցեն և զմարմնոցն կերակուր: Եւ ապա Քահանայիցն սրբոց երաստք՝ նոյնպէս անօրէնք Սիրոյն Քրիստոսի ի սպաս պաշտաման իւրաքանչիւր եկեղեցեաց և հիւանդանոցաց և բանտից. ապա և այն զունդք նուիրականք որ մեծապէս օժանդակ լինին մերումս պաշտաման, զզանազան կարգս ասեմ կանոնաւոր քահանայից հաստատելոց ի մերում վիճակիս. և ապա խոնարհադոյնն դաս՝ բայց սիրելին ժողովրդոց և արդեամբք վաստակոցն զարմանալի: Եղբարքն ուսուցիչք վարդապետութեան հաւատոյ:

Առնթեր արիազունդ հահատակացս այսոցիկ Սիրոյ կարգեալ կազմեալ կան կուսանք՝ առանձինն նուիրեալք ի նորին պաշտօն. Դատերքն ողորմութեան սրբոյն Վիկենտեայ Պաւլայեցոյ, Աւգոստինեանք հիւանդանոցին, Հիւրընկալքն սրբոյն Թովմայի Վիլնովացոյ, Նեւերեան Դատերք զթութեան, Քորք երանունոյ Կուսին, Քորք սրբոյն Անդրէի, Քորք Յովսեփայ աստուածահօրն, Քորք Քաջի հովուին սուրբ Աստուածածնի եկեղեցոյն, և այլք բազումք զորոց ոչ բաւեմք յիշատակել զանուանան, և որք ըստ օրինակի ժրջան մեղուաց իբրու ընդ հակառակս իրերաց եռանդազին վաստակեն ի

միայնանոցս իւրեանց՝ պատրաստել ի պէտս վշտակիր անդամոցն Քրիստոսի զմեզր երկնայնոցն քաղցրութեանց, և ի բուժումն վիրաց նոցին սպեղանիս խղոց անուշից :

Բայց անաւասիկ աճեալ ընդարձակի տեսարանն մեծ, և ևս քան զևս սխրալի հանդիսանայ : Անդատին իսկ յազմկաց աշխարհի ընթացեալ մտանեն ի ներքոյ զրօշուցն Քրիստոսի՝ բորբոքեալք Սիրոյն եռանդեամբ՝ զունդք զունդք անհամարք ընչաւէտ քրիստոնէից, ընտիր ընտիր երիտասարդաց, պարկեշտ արուեստագիտաց, որ և յիւրեանց ստացուածոցն մասն մեծ խառնելով՝ սիւնն առ աղքատս զամենայն զմխիթարութիւն աստուածային և մարդկային. և սորա են բազմաթիւ Խորհրդակցութիւնքն Վիկենտեայ Պաւլայեցոյ, և Ընկերակցութիւնք Փրանկիսկոսի Հոեղեան, Փրանկիսկոսի Վասաւրեան, պաշտպանութեան սրբոյն Նիկողայոսի, Բարեկամաց մանկութեան, Բարեկամաց համբակաց արուեստից, և այլ ևս բազումք զորովք հարկ է լուծեամբ անցանել :

Սակայն ո՞վ որ կարող իցէ մանաւանդ ըստ արժանւոյն դրուատել զնախանձ բարեպաշտութեան տիկնայցն քրիստոնէից, որ քաջ զիտելով միաբանել զպարտս ընկերական և ընտանեկան կենցաղոյ ընդ զործունեայ բարերարութեան, զեղեցիկ իմն պանծանօք պարծին կոչել զանձինս Տիկնայս Վթասիրութեան կամ Ողորմութեան, Մայրութեան, Բանտից, Պաշտպանութեան, սրբունոյն Աննայի, սրբունոյն Գենովափեայ, կամ թէ հիւանդաց կա-



րօտելոց , հիւանդանոցաց , մանկավարժոցաց , մարաց ,  
արուարձանեաց , և արիական իմն քաջութեամբ Մու-  
րացիկը լինին ի պէտս տառապելոց . մուրացիկը սրդարե  
վսեմականք Քրիստոսի , որք ձեռս ի մոյր կարկառն  
սակս ամենայն ողորմածութեանց զորս յիշատակեցաք և  
զորս ոչ յիշեմք յանուանէ . բայց չկարեմք անյիշատակս  
թողուլ ընդ նոսին զԵկեղեցական վարժարանս փոքունս ,  
զԿարմեղականաց փանս , և զհիւրանոցն Մարիամու  
Թերեղիայ :

Այս է աւասիկ մեծն այն բանակ Քրիստոսի , որոյ  
փանն նայցեմք մեր ի վերուստ կամարս յազթութեան  
քաջ ի բաց զերազանցս մեծութեամբ և փառօք քան  
զերկրաւորսն առ նասարակ , յորժամ մարգարէական  
աչօք նաւատոյ նկատեալ զմեծ զօրագլուխ նորին ի  
զրունս յախտենից եկեալ նասեալ իւրովքն նանդերձ ,  
յիտ տիրապետելոյն աշխարհիս ի ձեռն Սիրոյ և զթու-  
թեան ՝ զոչեսցուք ընդ Սաղմոսերգուին զյազթական  
նուագան . « Համբարձէք իշխանք զզրունս ձեր ի վեր ,  
« և մոյէ թագաւոր փառաց : » — Եւ հրեշտակքն նար-  
ցանեն . « Ո՛վ է սա թագաւոր փառաց : » Եւ մեր տամբ  
պատասխանի . « Տէր զօրութեանց , սա ինքն է թագաւոր  
փառաց » միշտ յազթող ի մրցմունս սիրոյ ընդդէմ  
անձնահաճ մտաց , և որ զթշնամիս իւր նկունս ասնէ  
չնորձօք և զորժովք մարգասիրութեան <sup>(52)</sup> :

Այլ մինչև նասեալ իցէք ի յազթականն այն մուտս ի  
քաղաքն յախտենից , աստէն իսկ օրհնեսցէ Աստուած

դամենեսեան զձեզ որ այդքանեաւ արիութեամբ և անխոնջ տեսականութեամբ անձնատուրք և անձնա- նուէրք դտանիք ի վաստակս տարժանելիս, և ի հանա- պագորդ աշխատութիւնս Սիրոյ : Սիրտ ձեր լի յուսով և սիրով՝ դտանէ ի նոսին սիտփանս անձառելիս, ընդ այն չիք երկրայութիւն. սակայն առ ընթեր ներքնոցդ այդոցիկ հրճուանաց սրտի՝ դտանին բազում անգամ և զզուանք և արհամարհանք ոչ սակաւք, և ոչ սակաւ ճանճրութիւնք և ապերախտութիւնք : Ո՛հ, ոչ ծածկի այն յԱստուծոյ. հայեցարուք ի հատուցումն փոխարինին և մխիթարե- ցարուք յանձինս :

Օրհնեսցէ Աստուած զՔրիստոնեայսդ զեռանասակս, որ փախուցեալք ի տեսարանաց և ի նշտութեանց աշխարհի, երանութիւն իմն համարիք անձանց՝ յայց առ աղքատս եղանել, ժողովել զմանկունս ընկեցիկս, հրահանդել զոմանս ի նոցանէ ի կատարումն պարտուց, կրթել և զայլս ի համբաղութեան արուեստից, զոմանց զվարձս բնակութեանցն հատուցանել և զայլոց զսպարտս, սուրբ առնել զամուսնութիւնսն ապօրինաւորս, մխի- օթարել զազգատո՛մս տնանկաղեալս, ձեռն օգնութեան մատուցանել առ կարօտեալս, և սրբել զարտասուս ամենայն թշուառացիոց :

Օրհնեսցէ և զտիկնայսդ քրիստոսասէրս, որ զյաւե- լուածս ձերոց ճոխութեանց և ժամանակի, ևս և զմայրենի զօրովոյ, ծախէք ի պահպանութիւն առաքինութեան, կամ ի դարման և ի նորոգումն անմեղութեան, և իննամս

սրտառուչս սուսասածնէք առ այնոսիկ զորս զստերս և  
որդեղիրս և քորս ի Քրիստոս անուանէք, ի սունս  
հովանաւորութեան և կամ յարուեստանոցս, ի քաղա-  
քամիջի և յարուարձանեայս : Սիրոյն նահատակք առա-  
քինիք, անուանք բազմաց առ ի ձէնջ հանդերձ յիշատա-  
կաւ արդեանցն ձերոց վրիպեցին անկան արդեօք ի յու-  
շոյ մերմէ. սակայն չիք և ոչ մի որ մտացեալ իցէ  
առաջի Աստուծոյ, և ոչ մի ինչ որ մտացեալ իցէ ի սիրտ  
ձերոյս Պիտապետի. օրհնեալք եղերուք ամենեքեան  
առ հասարակ, օրհնեալ և ընտանիք ձեր, օրհնեալ և  
մանկունք ձեր, օրհնեալ և ամենայն որ սիրելին է սրտից  
ձերոց :

Ո՛հ, երանի՛ է ձերուսն Առաջնորդի որում շնորհեցաւ  
զեզուլ այսպէս զսիրտ իւր առ ձեզ՝ հանդերձ խանդաղա-  
կաթ օրհնութեամբք : Երանի՛ նմա որ այգպիտում  
վիճակեցաւ պանծալի հօտիդ : Անբաւ է սատարութիւնն  
զոր առ ի ձէնջ ընդունի սա ի լրումն իւրոյ պաշտաման .  
և զուք ձերովդ անձնանուէր սպասահարկութեամբ թե-  
թեաբեռն գործէք զձանրութիւն հօգոց սորա, և զմանն  
ինչ սոսկալի պատասխանատուութեան սորա բառնայք  
ի սմանէ : Ենոր՛ յոյժ ոնի սա ձեզ առաջի Աստուծոյ և  
Քրիստոսի Յիսուսի. և իբրև ի փոխարէն իւրոյն առ  
ձեզ պարտեաց՝ անա խոստանայ կրկին ևս յաճախել  
վասն ձեր զպօթս իւր և զսէր առաջի սեղանոյ անմահ  
Պատարագին :

Եւ ի վախճան բանիցս այսոցիկ քաղցր է մեզ աշխար-




հաքարոց առնել զներքինս զայս և զաներկմիտ հաւանութիւն մտաց մերոց, զի թէ երբէք սպառնալիք աստուածասատ բարկութեան իցեն ի վերայ Փարիզ քաղաքի, որպէս երբեմն ի վերայ ՚ինդ քաղաքացն մեղապարտից՝ սակս սնազին եղերանցն որ ի նոսա գործէին, արդարև՝ Եղբարք սիրեցեալք, Մէրն ձեր հօգորագոյն քան զամբարշտութիւն՝ ի բաց զարձուացէ զվրէժմանդիրն շանթիս, և խնայեսցէ, Աստուած ի քաղաքս յայս ի մեծ՝ յաղազս այնքանեաց ողորմութեանց զորս առնէք զուք ի սմա : Վասն որոյ, մխիթարիչքդ Փարիզոյ ի հանապազորդ վիշտս իւր՝ միանդամայն և փրկարարք էք սորա յանդիման արդարութեանն Աստուծոյ : Այո, յետ Աստուծոյ, ո՛հ Հաւատացեալ ժողովուրդք, զուք էք որ կեանս տայք կիսակենդան ընկերութեան մարդկան՝ յետ զնոյն կեանս ձծելոյ յաստուածեղէն Սիրոյն վասն ձեր և ի սնունդ ողոց ձերոց :

Ո՛վ Մէր, ո՛վ աստուածսիրութիւն և եղբայրսիրութիւն որ ի սրտէն Յիսուսի իբրև յանսպառ աղբերէ զետանե տիս անդադար, զու ինքն ես կենդանութիւն հողոյ և մարդկայինս ազգի : Արի եկ ի սիրտս մեր և ջնջեա առ ի մէնջ և զնեա անձնահաձ և անյաղուրդ կրից. ցրուեալ փարատեա ի մէնջ զամենայն սլատճառս հերձուածոց և բաժանմանց զկործանիչս ժողովրդոց : Ո՛վ աստուածայինդ Մէր, միաբանեա զամենայն մարդիկ ի մի միայն ազգատո՛մ եղբարց. մի՛ ես այլ եղիցի նոցա մերձել զմիմեանս և կամ չափ և սահմանս կարգել սիրոյ իւրեանց

առ իրեարս . թող ամենայն ոք, զի միանգամայն ասացից,  
աստար լիցի իւրովսանն ի տիեզերականն դաշնակաւո-  
րութիւն՝ յօգուտ հասարակաց զանձն նուիրելով . քանզի  
ի սիրտ զոր գուն ընդարձակես՝ ամենեցուն են օթեանք,  
սոսկականաց և ազգատոհմից, քաղաքի և հայրենեաց,  
աշխարհի և համօրէն տիեզերաց :

Եւ ընթերցցի Պատուիրանազիրս այս յեկեղեցիս և ի  
մատրոնս մերոյս վիճակի, ի ժողովրդապետականն և  
յառանձնականս, ի կիրակէի որ յետ ընդունելութեան  
սորին :

Տուա ի Փարիզ մերովս ստորագրաւ և վաւերական  
կնքով, և ձեռնագրութեամբ հանրական Ատենազպրի  
արքեպիսկոպոսարանիս մերոյ, ի 20 ապրիլի յամի  
Տեառն 1852 :



**Մ. ԴՈՄԻՆԻԿՈՍ ԱԻԳՈՍՏՈՍ**

Արքեպիսկոպոս Փարիզ քաղաքի .

Ի հրամանէ Աստուածապատիւ Արքե-  
պիսկոպոսին

ԹՈՒՅԱՆ, Կանոն . պատուոյ ,

Ատենազպ . հանր :

**Թարգմանեաց ի մերս**

**Հ. ԳԱՅՐԻԷԼ Վ. ԱՅՎԱԶՈՎԱՔԻ**

**ՄԻԻԹԱՆԵԱՆ**

**Տեսչի նստանոց ի Մոսկուտեան Վարժարանին :**





## ԾԱՆՅՈԹՈՒԹԻՒՆՔ

<sup>1</sup> Մատթ. 9, 53 :

<sup>2</sup> « Քանզի արդարութիւն քան զամենայն առաքինութիւնսն բարոյականս գերազոյն է. » Ս. Թովմ :

<sup>3</sup> « Որ ամենեցուն զիւրն հատուցանէ, յայլոցն ակն ոչ զնէ, զանձին շահու զանց առնէ զի հասարակաց հաւասարութեանն զգուշասցի. » Ս. Ամբրոս. Ա, Յգ. Պատշ :

<sup>4</sup> « Քանզի նոյն ինքն արմատ է հասարակաց բովանդակ կարգի մարդկեղէն ընկերութեան. » Ս. Թովմ :

<sup>5</sup> « Պայծառագոյն յառաքինութիւնս փայլէ արդարութիւն, և ոչ զիշերավարն և ոչ արուեսակ սքանչելիք են իբրև զնա. » Ի Բարոյ. Բ :

<sup>6</sup> « Յարգարութեան է առաքինութեանն լուսափայլ պայծառութիւն, յորմէ և արք բարիք առնուն զանուանակոչութիւն. » Յգ. Սահմ. բար. և չար :

<sup>7</sup> « Քանզի պատճառք սիրոյ ընկերին ինքն իսկ Աստուած է, սէրն ոչ առ Աստուած միայն այլ և առ ընկերն ձգեալ հասանէ. » Ս. Թովմ :

<sup>8</sup> « Աստուած սէր է. » Ս. Յովհ. Գ, 16 :

<sup>9</sup> « Չգեցի զնոսա կապանօք սիրոյ իմոյ. » Ովս. ԺԱ, 4 :

<sup>10</sup> Մատթ. ԺԳ, 36—40 :

<sup>11</sup> Ս. Թովմ. մասն Բ, հատ. Բ :

<sup>12</sup> Յովհ. ԺԳ, 1 :

<sup>13</sup> Ս. Թովմ. մասն Բ, հատ. Բ :

14 Ա. Յովհ. Գ, 7 :

15 Անդ, 8 :

16 Ա. Յովհ. Գ, 12 :

17 Անդ, 20 :

18 Անդ, 21 :

19 Ա. Յովհ. Ե, 1, 2, 3 :

20 Խորհրդած. հատուած Թ, Յխառս Քրիստոս :  
21 Տես և զերկրորդ թուղթն առ Մակեդոնիոս :

22 Ս. Թովմ. մասն Գ, խնդ. Խ Է :

23 Յղ. յաւել. գիտ. գիրք Է :

24 Կողոս. Գ, 14 :

25 Եսայ. ԺԳ, 14 :

26 Ծննդ. Բ :

27 Մատթ. Բ, 44, 45 :

28 Չի charité ի գաղղիական բարբառ, և charitas ի լատինն՝ արմատ ունին գյունական ձայնքս χάρις, որ է շնորհ, սէր, սորմուքիւն, և շարձ, բերկրուքիւն, խնդրուքիւն :

29 Շաթոպրիան, Ողի Քրիստոսեւոքեան, գիրք Բ, գլ. Գ :

29\* « Ընկերի անուամբն, ասէ սուրբն Օգոստինոս, ոչ  
« միայն զայնոսիկ իմանայ աւետարանն որ արնակցու-  
« թեան զօղիւ կցորդք մեղ իցեն, այլ և դամնեւեանն առ  
« հասարակ ընդ որս հաղորդութիւն ունիցիմք բնութեան,  
« օրինաց ճննդեան և սարգևի բանականութեան որ ի մի  
« լծորդէ զմարդիկ ի նմին ընկերակցութեան : Այս իսկ  
« է զոր ճշմարտութեանն լոյս ի նիթանոսութեան ժամա-  
« նակն ևս ծաղկաց ի հանձարսն չքնաղաղիւսս, և

« կատակերգակ քերթողին ծանոյց, որ ձերունիս երկուս  
« նանեալ ի տեսարան զրուցակիցս՝ միումն ասել տայ .  
« Եւ ունիցի՞ս դու այնքան պարապ ի քոյոցդ զբաղմանց  
« զի և զայլոցն իրս հոգայցես՝ որ չիցեն քեզ անկ . » և  
« միւսումն առնէ զայս տալ պատասխանի . « Մարդ եմ,  
« և ոչ ինչ մարդկեղէն յինէն օտար նամարիմ » . Ընդ որ  
« ծափ զծափի նարեալ զրուստեցին միաբան բաղմա-  
« կանքն առ նասարակ : Սմին իրի, թէպէտ և էին և անդ  
« արբ յոլովք տղէտք մտօք կամ սպականեալք սրտիւք,  
« սակայն ոչ էր և ոչ մի ոք որ թաղուն աղղմամբն տպա-  
« տրելով ի խորս բնութեան չիմանայր՝ թէ քանզի մարդ  
« է, ոչ կարէ նամարել իւր ընկեր և զայլ ամենայն  
« մարդ » Ս. Օգոստ. Թուղթ առ Մակեդոնիոս :

<sup>30</sup> Յգ Սահմ. բարւոյ և չարի, գիրք Ե :

<sup>31</sup> Մատթ. Ե, 44—48 :

<sup>32</sup> Ոմանք ի մատենագրաց բանաւորականքն անուա-  
նելոց՝ ոչ շատ նամարեալ գնրապուրանաց բանս, նամար-  
ձակեցան ամբաստան լինել զքրիստոսական կրօնից՝  
որպէս թէ զեղբայրսիրութեան խրատսն յայլոց ի վաղեմի  
վարդապետութեանց իցէ առեալ : — Զայս ասացեալ քաջի  
Գիտապետիս՝ ներքել առնու զբանս այնպիսեացն հօօր  
փաստիւք ի ծանօթութիւնս ընաղրին. այլ մեք ոչ յուժ  
կարևոր մերոցն նամարելով զինզիրան, առ տեղեալս  
զանց արարաք թարգմանել :


<sup>33</sup> Ս. Յովհ. Դ, 8 և 16 :

<sup>34</sup> Բ. Յովհ. ԺԳ, 16 :



- <sup>35</sup> Անդ, Գ, 9, 10 :
- <sup>36</sup> Յովհ. Բ, 2, և ի Թուղթսն Պողոսի սաէսլ :
- <sup>37</sup> Յովհ. Ա, 14 :
- <sup>38</sup> Մատթ. Ա, և Ղուկ. Գ, 25 :
- <sup>39</sup> Յովհ. Ա, 12 :
- <sup>40</sup> Բ Պետր. Ա, 4 :
- <sup>41</sup> Յովհ. Ա, 14 :
- <sup>42</sup> Ա. Յովհ. Գ, 1 :
- <sup>43</sup> Ա. Յովհ. Գ, 17 :
- <sup>44</sup> Ս. Թովմ :
- <sup>45</sup> Գործ. Ա, 1 :
- <sup>46</sup> Յովհ. ԺԳ, 55, 54 :
- <sup>47</sup> Յովհ. ԺԵ, 12 :
- <sup>48</sup> Գրիգ. մեծն, ճառ ի Է յԱւետար :
- <sup>49</sup> Յովհ. Գ, 16 :
- <sup>50</sup> Հերոն. զիրք Գ, ԳԼ. 2, Մեկն. Թղթ. առ Գաղատ :
- <sup>51</sup> « Քանցի զտուրս զուարթառաստս սիրէ Աստուած . »  
Բ Կոր. Թ, 7 :
- <sup>52</sup> Սաղմ. ԻԳ, 7 :









5006

12 0 5

